



BOSNA I HERCEGOVINA
Ministarstvo odbrane-obrane



БОСНА И ХЕРЦЕГОВИНА
Министарство одбране



NAŠA VOJSKA НАША ВОЈСКА

Bilten Ministarstva obrane - odbrane i Oružanih snaga Bosne i Hercegovine
Билтен Министарства одбране - одбране и Оружаних снага Босне и Херцеговине

★ ★ juli/srpanj 2025. broj 28

јули 2025. broj 28 ★ ★



VRIJEME OPREMANJA I VELIKIH VJEŽBI



„Naša vojska“ Bilten Ministarstva odbrane i Oružanih snaga BiH

Broj 28

Juli 2025. godine

Izdavač:
Ured za odnose s javnošću
Ministarstva odbrane BiH

Za izdavača:
Uma Sinanović

Saradjuju:
Sektor i organizacijske jedinice MO
BiH
ZŠ OS BiH, Medijsko-informativni
centar (MIC),
komande i jedinice OS BiH

Uredio:
Antonio Prlenda

Lektor:
Čedomir Marković

Ured za odnose s javnošću
Ministarstva odbrane BiH

Adresa:
Hamdije Kreševljakovića 98,
71000 Sarajevo

www.mod.gov.ba
info@mod.gov.ba

Kontakt telefon:
033/286-680

Fax: 033/286-685

Tehnička priprema i štampa:
„INTEA BH“ d.o.o.
Srđana Aleksića 22,
71000 Sarajevo
Telefon: 033/452-009

info@intea.ba
www.intea.ba

MENAŽDMENT MO I OS BiH U PENTAGONU

BILATERALNI RAZGOVORI S KLJUČNIM PARTNEROM ZA BiH

Najviša delegacija Ministarstva odbrane i Oružanih snaga BiH boravila je od 22. do 26. aprila u službenoj posjeti Sjedinjenim Američkim Državama, u okviru realizacije aktivnosti Bilateralnih odbrambenih konsultacija između Ministarstva odbrane Sjedinjenih Američkih Država i Ministarstva odbrane Bosne i Hercegovine.

U sklopu aktivnosti, upriličena je posjeta Nacionalnoj gardi savezne američke države Maryland, koja više od 15 godina saraduje s Oružanim snagama BiH na razvoju sposobnosti i interoperabilnosti s NATO savezom.

U delegaciji MO BiH, uz ministra odbrane BiH Zekana Heleza i njegove zamjenike Slavena Galića i Aleksandara Goganovića, u bilateralnim odbrambenim razgovorima u Pentagonu učestvovali su i načelnik Zajedničkog štaba OS BiH general-pukovnik Gojko Knežević, pomoćnik ministra odbrane BiH za međunarodnu saradnju Zoran Šajinović, kao i generalni inspektor MO BiH brigadni general Edin Fako. Delegaciju Ministarstva odbrane SAD predvodio je zamjenik pomoćnika američkog ministra odbrane za Evropu i NATO David Baker. Završnom dijelu konsultacija priključila se i Katherine Thompson, pomoćnica sekretara za odbranu za međunarodne sigurnosne poslove.

Tokom susreta razgovarano je o dosadašnjoj i budućoj saradnji, uključujući obuku, kapacitete za odgovor na krizne situacije te jačanje interoperabilnosti između Oružanih snaga BiH i Oružanih snaga SAD-a. Zajednička je ocjena da se bilateralna vojna saradnja uspješno odvija u brojnim oblastima, koje su ključne za očuvanje operativnih sposobnosti i kapaciteta OS BiH. Predstavnici MO SAD prezentovali su novu strategiju Trumpove administracije te očekivanja da Evropa učini više na izgradnji konvencionalnih vojnih kapaciteta, što zahtjeva veća izdvajanja za odbranu evropskih zemalja uključujući i Bosnu i Hercegovinu. U razgovorima je naglašena posvećenost SAD-a sigurnosti i stabilnosti Zapadnog Balkana, posebno daljem razvoju BiH i njenom putu ka evroatlantskim integracijama. Pozdravljen je dosadašnji rad EUFOR-a i posebno raspoređivanje rezervnih snaga kada to situacija na terenu zahtijeva. Također je naglašena američko-jadranska inicijativa (A5), kao ključni forum za nastavak angažovanja na Balkanu.



Tokom posjeta SAD-u, ministar Helez je predvodio državnu delegaciju BiH u svojstvu guvernera MMF-a BiH na proljetnom zasjedanju u Washingtonu. Helez je razgovarao i sa Emirom Nurkićem, suosnivačem Vijeća za razmjenu između Marylanda i BiH i operativnim direktorom Instituta za razvojni uticaj, kao i Adnanom Hadrovićem, savjetnikom za diplomatiju, međunarodne odnose i globalnu sigurnost pri istom institutu i također suosnivačem navedenog Vijeća.

Zamjenici ministra Galić i Goganović posjetili su Nacionalnu gardu Marylanda, s ciljem jačanja odbrambene saradnje i razmjene iskustava u području sigurnosnih i vojnih politika. Na poziv Nacionalnog odbrambenog univerziteta (NDU), Galić je posjetio je ovu prestižnu obrazovnu instituciju u Washingtonu te se susreo s direktorom NDU-a ambasadorom Andrewom Youngom. Načelnik ZŠ OS BiH general Knežević sastao se sa vršiocem dužnosti direktora za strategiju, planove i politiku (J-5) Združenog štaba OS SAD general-majorom Markom Slokumom.



**BATALJONSKA GRUPA
LAKE PJEŠADIJE OS BiH
U PUNOM SASTAVU NA
MEĐUNARODNOJ VJEŽBI**



Oružane snage Bosne i Hercegovine uputile su 400 pripadnika Bataljonske grupe lake pješadije u Hrvatsku, gdje su učestvovali u međunarodnoj vježbi “Immediate Response 25”. Ova vježba predstavlja dio najveće godišnje vježbe koju je pod nazivom “Defender 25” predvodila Komanda američke kopnene vojske za Evropu i Afriku.

Vježba “ Immediate Response 25” realizovala se od 26. maja do 9. juna na teritorijama Hrvatske, Albanije, Bugarske, Crne Gore, Grčke, Sjeverne Makedonije, Slovačke i Kosova* (navođenje Kosova ne prejdudicira njegov pravni status). Kao takva, dio je šireg kompleksa vježbi pod nazivom “DEFENDER 25”, koje predvodi Komanda kopnenih snaga SAD za Evropu i Afriku (USAREUR-AF). Cilj vježbe je jačanje interoperabilnosti, sposobnosti zajedničkog djelovanja i podrška NATO regionalnim planovima.

Pored pripadnika OS BiH, u vježbi su učestvovali i vojnici iz Sjedinjenih Američkih Država i još šest saveznika. Bataljonska grupa lake pješadije, kao najveća NATO-deklarirana jedinica iz BiH, potpuno je osposobljena za obuku i djelovanje u okviru snaga Alijanse, čime se dodatno jača interoperabilnost OS BiH sa NATO partnerima. Ovo je bila prva međunarodna vježba van granica Bosne i Hercegovine na kojoj su OS BiH učestvovala kompletnim sastavom Bataljonske grupe lake pješadije, što ih čini najbrojnijim kontingentom u okviru čitave vježbe

Orijentacija pa integracija

Nakon što je američki 115. bataljon vojne policije Nacionalne garde Marylenda (NGMD) stigao na poligon “Crvena zemlja” u Republici Hrvatskoj, pripadnici Bataljonske grupe lake pješadije (BGLP) OS BiH obavili su orijentaciju, integraciju, zajedničku obuku i posljednje pripreme za realizaciju vježbovnog bojevog gađanja (LFX), koja je uslijedilo u sklopu vježbe “Immediate response 25”.

U skladu sa dodijeljenom misijom, komanda BGLP obavila je proces donošenja vojnih odluka (PDVO), dok su podređene jedinice realizovale proces vođenja trupa (PVT), uvježbavale standardne operativne procedure (SOP), realizovale obuku i koordinaciju zadataka s partnerima iz 115. bataljona vojne policije NGMD. Na poligonu je vladala odlična atmosfera, motivacija i moral pripadnika bili su visoki, a uslovi za život i rad u logorskoj prostoriji i terenu idealni.



Ministar odbrane BiH Zukan Helez, zajedno s generalima OS BiH Tomom Kolendom, Mirzetom Lubenovićem i Zdravkom Rezom, prisustvovao je 4. juna Danu visokih zvanica u okviru međunarodne vojne vježbe “Immediate Response 25”. Ministar je tom prilikom posjetio pripadnike Bataljonske grupe lake pješadije Oružanih snaga BiH, pohvalio njihov profesionalni doprinos i istakao važnost njihovog angažmana u ovoj značajnoj međunarodnoj aktivnosti.

Ministar odbrane Zukan Helez tokom posmatranja vježbe na Udbini s brigadnim generalom Andrewom Collinsom iz Nacionalne garde Marylenda i generalmajorom Denisom Tretinjakom iz OS RH istakao važnost učešća OS BiH u vježbama ovog nivoa za jačanje saradnje i interoperabilnosti s partnerskim i savezničkim snagama.

„Učešće Oružanih snaga Bosne i Hercegovine u ovakvim međunarodnim vježbama dodatno učvršćuje naš put





ka konačnom cilju, članstvo u NATO savezu, te potvrđuje opredijeljenost naše države za jačanje međunarodne saradnje, razvoj interoperabilnosti i unapređenje odbrambenih kapaciteta u skladu sa savremenim bezbjednosnim standardima", istakao je ovom prilikom ministar Helez.

Prvi put helikopter OS BiH na stranjoj vježbi

U ovoj vježbi, po prvi put van granica Bosne i Hercegovine, učestvovala je i posada helikoptera UH-1H-II Huey 2 iz sastava 2. helikopterskog skvadrona Brigade zračnih snaga i protivzračne

odbrane OS BiH. Uz letačku posadu, zajedno s ljekarom, izvršavali su stvarni zadatak medicinske evakuacije (MEDEVAC) u okviru ove vježbe, za potrebe Oružanih snaga BiH i Oružanih snaga Sjedinjenih Američkih Država.

Svi učesnici ovog letačkog sastava OS BiH na vježbi bili zadovoljni realizovanim. Dobili su izvrsne ocjene i od stranih učesnika. Za potrebe MEDEVAC dežurstva, helikopter OS BiH po danu bi preletio na poligon Crvena zemlja, a preko noći bi bio smješten u hangaru. Od strane domaćina u zrakoplovnoj bazi Hrvatskog ratnog zrakoplovstva u Zemunik kod Zadra bili su dobro primljeni.

Pripadnici VOB-a na vježbi „LAUFER 25“

Oružane snage Bosne i Hercegovine učestvovali su na međunarodnoj vojnoobavještajnoj terenskoj vježbi (FTX) koja je zasnovana na integraciji sposobnosti za prikupljanje i analitičku obradu obavještajnih podataka u ISTAR (Intelligence, Surveillance, Target Acquisition and Reconnaissance) arhitekturi, koja će formirati vojnoobavještajni element podrške MISE (Military Intelligence Support Element) u podršci jedinice nivoa divizije. FTX vježba „LAUFER 25“ se izvodila paralelno s vježbom „IMMEDIATE RESPONSE 25“.



ZAJEDNIČKA VJEŽBA SA EUFOR-om JAČA INTEROPERABILNOST



Oružane snage Bosne i Hercegovine (OSBiH) zajedno sa snagama Evropske unije (EUFOR) održale su multinacionalnu vojnu vježbu od 8. do 13. juna na području Bihaća i Manjače.

Vježba "Kombinovani odgovor/Combined Response 25" je posebno osmišljena da se uvježbaju i usavrše taktike operacija podrške miru (PSO) na nivou čete i bataljona Oružanih snaga BiH i EUFOR-a.

Cilj zajedničke vježbe bio je unapređenje stepena interoperabilnosti i operativnih sposobnosti između OS BiH i međunarodnih vojnih snaga, u okviru zajedničke misije i operacija podrške miru. U nekoliko dana vježbe, posebno težište stavilo se na unapređivanje sposobnosti rukovođenja i komandovanja, planiranja i izvođenja operacija podrške miru te interoperabilnosti multinacionalnih vojnih jedinica.

Vježba je počela u nedjelju, 8. juna, raspoređivanjem jedinica na poligon Manjača, te je trajala do petka, 13. juna, kada su jedinice krenule nazad na svoje lokacije. U prva tri dana, pripadnici OS BiH i EUFOR-a su izvodili zadatke vezane za „operacije podrške miru“, kao što su: kontrola nereda, patroliranje, operacije pretraživanja i čišćenja, te uspostava kontrolne tačke (check point).





U okviru ove vježbe OS BiH su predstavljali pripadnici Komande 2. pješadijskog bataljona 6. pješadijske brigade (2.pb/6.pb) i jedna pješadijska četa iz sastava 2.pb/6.pbr, tim za uklanjanje eksplozivnih sredstava (EOD) iz sastava Brigade taktičke podrške OS BiH te dva helikoptera Brigade zračnih snaga i protivzračne odbrane OS BiH.

Pripadnici EUFOR-a u ovoj vježbi učestvovali su s jednom četom iz sastava austrijskog kontingenta, te ostalim pripadnicima iz

sastava bugarskog, italijanskog, rumunskog, turskog i mađarskog kontingenta, kao i jednim helikopterom i bespilotnom letjelicom.

Ključni događaj vježbe bio je Dan visokih zvanica (DV Day), održan 12. juna. Ovom događaju je, uz načelnika Zajedničkog štaba OS BiH general-pukovnika Gojka Kneževića, prisustvovao i komandant EUFOR-a general-major Floriana Mariana Barbua, te ostali generali i visoki zvaničnici OS BiH i EUFOR-a.



KVALIFIKACIJSKO BOJEVO GAĐANJE OKLOPNOG
BATALJONA BRIGADE TAKTIČKE PODRŠKE OS BiH

KAD TENKOVI ZAGRME...

Oklopni bataljon Brigade taktičke podrške pripremio je i izveo kvalifikacijsko bojevo gađanje tenkom M-60A3 i oklopnim transporterom M-113A2 u periodu od 2. do 5. juna, na glavnom poligonu za obuku OS BiH na Manjači. Gađanje je pokazalo veoma visok nivo profesionalizma i stručnosti prilikom obavljanja ovako izazovnih zadataka za vojnike OS BiH, te obučenost za složene zadatke.

Prema planu obuke, tri tenka M-60A3 zajedno sa četiri oklopna transportera M-113 izvela su bojeva gađanja stacionarnih ciljeva na poligonu Manjača na daljinama od 850 do 1.000 metara. U uvodnom dijelu održana je orijentacija o prostoru za izvođenje gađanja, izneseni su glavni podaci za tenk i transporter. Komandant oklopnog bataljona pukovnik Esnaf Avdić, održao je brifing o gađanju, a nakon toga su posade pristupile samom činu gađanja.

Prisutni predstavnici generalskog kora OS BiH pratili su sam tok priprema izvršenja kvalifikacijskog bojevog gađanja, obučenost posade na tenkovima i transporterima, a koje su prošle prvostepeno i drugostepeno ocjenjivanje. Gađanje je pokazalo veoma visok nivo profesionalizma i stručnosti prilikom obavljanja ovako izazovnih zadataka za vojnike OS BiH, te obučenost za složene zadatke.





Scenarij vježbe je predvidio angažovanje voda oklopnih transportera M113 koji će prvi stupiti u borbeni kontakt s neprijateljem, nakon čega će na njihov poziv djelovati i tenkovi M60. Transporterima M-113 zadatak je bio dopremiti pješadiju u prostore razmještaja, ali se, prema scenariju, ona nije mogla upustiti u borbu. Posebno značajna bila su dejstva tenkova M60 koji su kumulativnim granatama vrlo efektivno uništavali zamišljene protivnike na svim udaljenostima.

Tenkovi M-60 koriste top M-68 kalibra 105 milimetara koji najbolje rezultate pruža na udaljenostima do 2.600 metara pri čemu može neposredno djelovati na udaljenostima preko sedam kilometara. Ono što je značajno istaći kod topa M-68, što su i dokazali tenkisti OS BiH jeste velika preciznost i minimalna greška po cilju.

Gađanje izgleda vrlo zahtjevno pri čemu za iskusnu posadu takav zadatak predstavlja niz uigranih komandi prilikom čega veliku ulogu ima balističko računalo. Upravo ovaj uređaj laserski mjeri udaljenost i određuje ugao gađanja kao i

sve druge parametre tako da nišandžiji ostaje kao glavni zadatak ispaljenje zrna. Donacijom kontingenta rezervnih dijelova za tenk M60 od Republike Turske, osigurano je kontinuirano obavljanje svih zadataka čemu je svjedočilo i današnje gađanje.

Gađanju je nadgledao general-major Mirzet Lubenović koji je istaknuo ulogu i značaj obuke pripadnika Oklopno-mehaniziranog bataljona OS BiH, te im zahvalio na uspješno realizovanim kvalifikacijskom bojevom gađanju.





IZVIĐAČI I MEDICINARI UNAPRIJEDILI INTEROPERABILNOST

U Vojnoj bazi „Jug“ kod Bujanovca, Republika Srbija, u periodu od 10. do 27. juna održana je međunarodna Vojna vježba „Platinasti vuk“ (Platinum Wolf 25).

U vježbi čiji su domaćini bili Vojska Srbije i Komanda savezničkih snaga SAD za Europu (US EUCOM), aktivno su učestvovali pripadnici Oružanih snaga BiH iz deklarisanog izviđačkog voda, kao i oficiri i podoficiri u ulozi instruktora i kontrolora na vježbi, te pokazali zavidne vještine i unaprijedili interoperabilnost u ekstremno toplim vremenskim prilikama.

Cilj ove vježbe bilo je unapređenje interoperabilnosti i međusobnog razumijevanja između vojski partnerskih zemalja u izvršavanju zadataka u multinacionalnom okruženju u operacijama podrške miru.

Težište prilikom izvođenja vježbe je bilo u ovladavanju vještinama



djelovanja u mirovnim operacijama uz učestvovanje više od 700 pripadnika, oružanih snaga iz Azerbejdžana, Bosne i Hercegovine, Crne Gore, Grčke, Italije, Mađarske, Rumunije, Sjeverne Makedonije, Sjeverne Irske, Sjedinjenih Američkih Država, Srbije i Velike Britanije, kao i Balkanskih vojno-medicinskih snaga (Balkan Medical Task Force-BMTF).

Prvi put od kada se ova vježba organizuje predstavnici Balkanskih vojno-medicinskih snaga su uspostavili modernu poljsku vojnu bolnicu ROLE 2, u čijem sastavu se nalazi 10 vojno medicinskih profesionalaca iz OS BiH, koji su demonstrirali pružanje medicinske pomoći, kao i evakuaciju u kriznim situacijama. Zbog izuzetnog zalaganja u dugogošdišnje predane službe komandant BMTF je odlikovao sa srebrnom medaljom BMTF pripadnicu OS BiH civilno lice Vericu Bajinac. Za zalaganje na vježbi sa prigodnom

srebrnom kovanicom nagrađeni su kapetan Cvjetko Tomić, vodnik Adnan Begović i vojnici I klase Vesna Railić.

Balkanske vojnomedicinska snage (BMTF) su multinacionalna vojna medicinska jedinica koja okuplja zdravstvene djelatnike iz šest balkanskih zemalja: Albanije, Bosne i Hercegovine, Crne Gore, Sjeverne Makedonije, Srbije i Slovenije kako bi brzo odgovorili na širok spektar regionalnih situacija pomoći u katastrofama, te je certificirana od strane NATO Centra izvrsnosti vojne medicine iz Budimpešte za učestvovanje u operacijama pod komandom NATO, EU i UN.

Delegaciju OS BiH predvodio je brigadni general Nebojša Bošnjak, zamjenik komandanta Operativne Komande OS BiH za operacij.



JTAC OS BiH ODLIČAN I NA STRANOM TERENU

Pripadnici tima specijalista za navođenje i kontrolu bliske zračne podrške (JTAC) iz sastava Oružanih snaga Bosne i Hercegovine učestvovali su od 13. do 24. juna na međunarodnoj vojnoj vježbi "Jadranski udar/Adriatic Strike 2025", koja se izvodila u Republici Sloveniji.

Pripadnici JTAC tima OS

BiH uspješno su prikazali svoje znanje i sposobnosti zajedničkog rada sa NATO snagama u multinacionalnom okruženju.

Tokom vježbe koja se izvodi na centralnom poligonu za obuku Slovenske vojske „Postojna“, JTAC specijalisti iz OS BiH su uspješno navodili vatru sa slovenačkih lakih aviona Pilatus PC-9M Hudornik

i austrijskih Pilatus PC-7, kao i hrvatskih izviđačko-jurišnih helikoptera OH-58S Kiowa Warrior. Uloga JTAC tima je da sa zemlje kontaktira i navodi zračne snage, koje će djelovati ubojnim sredstvima po svim vrstama ciljeva na tlu. Jasna i nedvosmislena komunikacija zato su ovdje imperativi.

U vježbi „Jadranski udar 2025“ učestvovalo je oko 800 učesnika, uključujući 400 pripadnika iz 30 savezničkih i partnerskih zemalja: Australije, Austrije, Belgije, Bosne i Hercegovine, Češke, Crne Gore, Danske, Estonije, Finske, Francuske, Grčke, Hrvatske, Italije, Kanade, Latvije, Litvanije, Mađarske, Njemačke, Holandije, Norveške, Poljske, Rumunije, Sjeverne Makedonije, Slovačke, Španije, Švedske, Švicarske, Turske, Ujedinjenog Kraljevstva i Sjedinjenih Američkih Država.

Avioni na vježbi polijetali su s aerodroma Cerklje i Brnik, dok su hrvatski Pilatus PC-9M, italijanski Eurofighter EF 2000 i američki F-16 iz Avijana, podržavati vježbu iz svojih matičnih baza.



Ugašen požar na području Gruda

U gašenju više požara kod Gruda, helikopterske posade su pomagale i izvan dužnosti, kada su pomogli ženi koja se povrijedila u saobraćajnoj nesreći. Aktivna oba helikopterska skvadrona.

Prvi protivpožarni angažman helikoptera OS BiH ove sezone uslijedio je samo dan nakon što je 25. juna, obavljena vježba „Nepogoda 25“, kojom je na aerodromu Mahovljani testirana spremnost letačkih posada OS BiH za ovogodišnju protivpožarnu sezonu.

Uz učešće helikoptera Oružanih snaga Bosne i Hercegovine ugašeni su višednevni požari u širem području Gruda, u čijem gašenju su učestvovala oba helikopterska skvadrona Brigade zračnih snaga i protivvazdušne odbrane OS BiH, sa Mahovljana i Rajlovca.

Helikopteri OS BiH tipa UH-1H-II Huey 2 angažovani su na području općine Grude odmah po odobrenju Predsjedništva BiH 26. juna, kako bi pomogli u gašenju požara koji je harao nepristupačnim terenom na lokacijama Šušnjari – Pejčića Draga i Bobanova Draga.

Tada je na požarište upućen helikopter iz sastava 2. helikopterskog skvadrona OS BiH iz Rajlovca. Poslije je na njegovo mjesto došao helikopter s posadom iz sastava 1. helikopterskog skvadrona OS BiH s Mahovljana kod Banje Luke. Četo pri snažnom vjetru, gasili su požare u mjestu Sovići, kod Tihaljine i Drinovaca, također u općini Grude, u neposrednoj blizini solarne elektrane. Helikopter je uzimao vodu iz jezera Krenica, pri čemu je za jedan ciklus punjenja, odvoza i povratka bilo potrebno svega nekoliko minuta, čime se osiguravala efikasna i brza intervencija. Požar je uspješno ugašen 30. juna.

Oružane snage BiH, a posebno njihove helikopterske jedinice, i ovoga puta pokazale su svoju visoku obučenos, tehničku opremljenost i spremnost da pravovremeno reaguju u slučaju prirodnih nepogoda i vanrednih situacija, pružajući podršku svim građanima u zaštiti života, imovine i prirodnih resursa naše zemlje.

Ovaj put, helikopterske posade su pomagale i izvan dužnosti. Naime, u jutarnjim satima, 28. juna u općini Grude, tokom vožnje od smještaja do lokacije pripreme helikoptera za gašenje požara, piloti Oružanih snaga BiH major Goran Rogan i major Jasmin Sinanović svjedočili su saobraćajnoj nesreći u kojoj je žena motornim vozilom udarila u potporni zid i doživjela povrede.

Brzom i prisebnom reakcijom, piloti su odmah pritekli u pomoć, izvukli su povrijeđenu osobu iz vozila, pružili joj prvu pomoć usljed povrede glave, zaustavili umjereno krvarenje i ostali s njom sve do dolaska hitne pomoći i pripadnika policije.

Odmah nakon ovog vanrednog događaja, piloti OS BiH su bez odlaganja nastavili svoju redovnu misiju, gašenje požara u izuzetno složenim meteorološkim uslovima, uz jak vjetar i otežane letačke operacije. S obzirom da su im domovi bili direktno ugroženi, stanovnici pogođenog područja su, nakon uspješnog gašenja požara, izrazili iskrenu zahvalnost pilotima OS BiH na pravovremenoj i nesebičnoj pomoći.





NOVA POMOĆ PRIJATELJSKE TURSKE

NAJNOVIJE POJAČANJE - OKLOPNI TRANSPORTERI MRAP KIRPI II

Svečana primopredaja četiri najsavremenija oklopna transportera MRAP KIRPI II s pratećom opremom, kao i potpisivanje protokola o primopredaji doniranih sredstava između Ministarstva odbrane Bosne i Hercegovine i Ministarstva nacionalne odbrane Republike Turske održana je 25. juna u kasarni „Rajlovac“.

Na ceremoniji primopredaje novih oklopnih vozila KIRPI II, Protokol o primopredaji doniranih sredstava u ime Ministarstva odbrane BiH potpisao je ministar Zukan Helez, dok je u ime Turske kompanije BMC potpisao Regionalni menadžer za razvoj poslova Erdem Can Ozdemir.

Ceremoniji su prisustvovali i načelnik Zajedničkog štaba Oružanih snaga BiH general-pukovnik Gojko Knežević, ambasador Republike Turske u Bosni i Hercegovini Nj.E. Emin Akseki, predstavnici EUFOR-a, predstavnici generalškog kora OS BiH, te ostali zvaničnici Ministarstva odbrane i Oružanih snaga BiH.

U svom obraćanju, ministar Helez je istakao, kako turska donacija predstavlja snažnu podršku modernizaciji i jačanju kapaciteta OS BiH. Naglasio je da ova vozila povećavaju borbenu spremnost, mobilnost i sigurnost naših vojnika, a ujedno unapređuju interoperabilnost s NATO snagama.

„Moramo biti svjesni vremena u kojem živimo. Oružane snage BiH postoje zbog svih građana naše zemlje i one su garant mira, stabilnosti i sigurnosti. Ova donacija, kao i prethodne, važan su korak ka dugoročnom jačanju sigurnosti Bosne i Hercegovine i treba jasno reći da su Oružane snage BiH stvarane za mir i budućnosti, a današnja podrška Oružanim snagama BiH još jednom potvrđuje posvećenost sigurnosti i stabilnosti u Bosni i Hercegovini te pokazuje kakve pouzdane prijatelje i partnere naša zemlja ima u Republici Turskoj“, naglasio je ministar.

Na kraju, ministar Helez je uputio posebnu zahvalnost predsjedniku Turske gospodinu Redžepu Tajipu Erdoganu i ministru odbrane Turske Jšaru Guleru na današnjoj i svim drugim pomoćima Oružanim snagama u koje su znatno unaprijedili odbrambene kapacitete te ubrzali naš put ka evroatlantskim integracijama.

Ambasador Republike Turske u Bosni i Hercegovini, Nj.E. Emin Akseki u svome obraćanju istakao je da su odnosi između Republike Turske i Bosne i Hercegovine zasnovani su na snažnom prijateljstvu, a da Turska snažno podržava teritorijalni integritet, suverenitet i ustavni poredak Bosne i Hercegovine, te pridaje veliku važnost očuvanju stabilnosti na Balkanu.

„Smatramo da će podrška naporima za modernizaciju Oružanih snaga BiH doprinijeti miru, stabilnosti i sigurnosti, kako u kontekstu djelovanja Ujedinjenih nacija, tako i šireg regionalnog okruženja. U tom kontekstu, vozila koja su danas isporučena predstavljaju jedan od najkonkretnijih primjera strateške vizije koja ima za cilj ne samo vojnu saradnju, već i jačanje regionalnog mira, stabilnosti i prijateljskih odnosa“ naglasio je Akseki.

TT karakteristike

KIRPI II MRAP (Mine resistant and Ambush protected Vehicle)

BMC Kirpi je vozilo otporno na mine i zaštićeno od napada iz zasjede. To je teško oklopljeno vozilo svjetske klase, koje pruža značajnu zaštitu od mina i balističkih prijetnji. Kamion se kreće sa svim raspoloživim točkovima, što ga čini pogodnim za obavljanje zadataka na bilo kojem terenu. Njegova primarna namjena je prijevoz pješadije od mjesta ukrcavanja do mjesta iskrcavanja, štiteći je od svih vrsta prijetnji. Međutim, može imati različite operativne namjene ukoliko je opremljeno potrebnom opremom za misiju.

Vozilo posjeduje višenamjensku platformu koja se može prilagoditi željenoj namjeni. Može se koristiti za različite taktičke svrhe, u skladu s zahtjevima misije. Osim komandira, vozača i nišandžije vozilo ima kapacitet prevoza do 10 vojnika s opremom. Vozilo u standardnoj opremi ima mogućnost vožnje sa probušenim gumama do 60 km, sistem za napuhavanje guma daljinski iz vozila, ABS i vitlo za samoizvlačenje.

Osnovne tehničke karakteristike (vozilo 4x4):

- a. Osovinski raspon: 4300 mm
- b. Ukupna dužina vozila: 7350 mm
- c. Ukupna visina vozila: 3210 mm
- d. Ukupna širina vozila: 2500 mm
- e. Masa praznog vozila: 18000 kg
- f. Ukupna masa vozila: 20000 kg
- g. Nosivost: 2000 kg
- h. Maksimalni prednji nagib: 60%
- i. Bočni nagib: 30%
- j. Radijus kretanja: 800 km
- k. Brzina: 125 km/h maksimalno
- l. Visina vodene prepreke: 1200 mm
- m. Klirens: 400 mm
- n. Visina zemljane prepreke: 400 mm
- o. Operativni raspon temperature: -32 do +55 stepeni C
- p. Motor: dizelski, šestcilindreni snage 275 kW
- q. Mjenjač: automatski, 6 brzina + R





NATO PROGRAM JAČANJA ODBRAMBENIH KAPACITETA

Nova terenska vozila za Vojnu policiju OS BiH

U kasarni „Rajlovac“ Oružanih snaga Bosne i Hercegovine 10. juna svečano je obavljena službena primopredaja specijalizovanih terenskih vozila doniranih za potrebe Vojne policije OS BiH. Donaciju je omogućila Vlada Republike Slovenije u okviru NATO-ove Inicijative jačanje odbrambenih kapaciteta BiH (DCBI).

Ceremoniji primopredaje četiti vozila Toyota Land Cruiser za Vojnu policiju OS BiH prisustvovali su ministar odbrane BiH Zukan Helez i ministar odbrane Republike Slovenije Borut Sajovic, zamjenik ministra odbrane BiH Aleksandar Goganović i načelnik Zajedničkog štaba OS BiH general-pukovnik Gojko Knežević, direktor za odbrambeno-sigurnosnu saradnju pri NATO sjedištu u Briselu Piers Cazalet te menadžerica NATO DCBI programa za BiH Renata Zaleska, predstavnici Ministarstva odbrane, Zajedničkog štaba i generalskog kora OS BiH, kao i ostale zvanice. U svom obraćanju, ministar Helez je iskazao zahvalnost Republici Sloveniji i NATO-u na kontinuiranoj podršci sektoru odbrane u Bosni i Hercegovini.

Primjer i drugim partnerima

„Posebno hvala za nesebičnu podršku dokazanih prijatelja naše zemlje, Države Slovenije, zbog kojih smo danas ovdje, na svečanoj primopredaji četiri potpuno opremljena specijalizovana terenska vozila za Vojnu policiju Oružanih snaga BiH. Hvala timu NATO-a DCBI za BiH, Ministarstvu odbrane Republike Slovenije i mojim saradnicima koji su vrijedno radili u proteklom periodu na ovom projektu“ istakao je ministar Helez.

Ministar Helez se također zahvalio ministru odbrane Republike Slovenije Borutu Sajovicu i Vladi Slovenije što su, kao vodeća nacija, realizovali ovaj projekat i donirali AED uređaje te obezbijedili obuku, čime su unaprijedili naše kapacitete za spašavanje života.

„Slovenija je od osnivanja OS BiH važan partner u reformi odbrane i jačanju naših kapaciteta, a njena podrška traje i danas“ naglasio je ministar Helez.

Ministar odbrane Republike Slovenije Borut Sajovic naglasio je da Slovenija ostaje posvećen partner Bosni i Hercegovini, te da kroz NATO DCBI inicijativu pruža konkretnu i trajnu podršku unapređenju sigurnosnog okruženja i jačanju stabilnosti u regionu.

„Ova vozila su najbolja vozila za vojnu policiju, a koristimo ih i mi u Slovenačkoj vojsci. Mogu se upotrijebiti za sve misije u zemlji, ali i u mirovnim misijama u svijetu,“ zaključio je ministar Sajovic.



U svom obraćanju, predstavnik NATO štaba u Briselu, Piers Cazalet, direktor za odbrambeno-sigurnosnu saradnju, istakao je da je NATO opredijeljen za partnerski odnos sa Bosnom i Hercegovinom.

„Republika Slovenija je prva NATO članica koja je isporučila pomoć u okviru DCBI paketa NATO-a. Ovakva specijalizovana terenska vozila ojačat će mobilnost i sposobnost Vojne policije OS BiH. Ovo je primjer i drugim partnerima u Savezu kako treba podržati ovu inicijativu za jačanje odbrambenih sposobnosti BiH. Zahvaljujući R. Sloveniji, Oružane snage BiH su sada bolje opremljene i intreoperabilnije sa NATO savezom. Ovo je pobjeda za sve“, rekao je Cazalet.



U razgovorima koji su uslijedili, sagovornici su razmijenili stavove o sigurnosnoj situaciji u Evropi i svijetu te istakli značaj misije EUFOR-a u BiH za mir i stabilnost cijelog regiona. Obostrano je istaknuta međusobna pomoć u situacijama prirodnih katastrofa, kao što su poplave u BiH 2014. godine, kada su u pomoć u sanaciji posljedica u BiH došli pripadnici Slovenačke vojske, te poplave u Sloveniji, kada su OS BiH kao pomoć uputile inženjerijsku jedinicu, koja je ostala u najboljem sjećanju lokalnom stanovništvu Slovenije.

Tokom razgovora, članovi slovenačke delegacije su pozvali predstavnike MO BiH na međunarodnu vojnu izložbu koja se u oktobru po prvi put održava u slovenačkom gradu Celju. Istakli su i neke slovenačke adute u proizvodnji bespilotnih letjelica, a ministar Helez je izrazio uvjerenje da različiti proizvodi vojne industrije BiH mogu biti zanimjivi i za slovenačku vojsku.

Zamjenik ministra odbrane BiH Aleksandar Goganović u svom je obraćanju naglasio da se Republika Slovenija oduvijek pokazala kao pravi prijatelj BiH i svih naroda koji u njoj žive, te da je regionalna saradnja ključ mira i stabilnosti u cijelom regionu. Dodao je da bez mirnog Balkana nema ni mirne Evrope te zaključio da put BiH ka punopravnom članstvu u Evropsku uniju nema alternativu.

U razgovorima je učestvovao i ambasador R. Slovenije u BiH Nj.E. Damjan Sedar, kao i predstavnici nekoliko sektora MO Republike Slovenije. U delegaciji MO BiH bili su i pomoćnici ministra odbrane BiH Dženan Redžo, Borislav Jezeraškić, Mišo Božićković i zamjenik komandanta Operativne komande OS BiH za resurse brigadni general Martin Propadalo.



Službeni sastanak ministara

Službena posjeta slovenačkog ministra odbrane Boruta Sajovica, otpočela je ujutru, sastankom u sjedištu Ministarstva odbrane BiH u Sarajevu, gdje su mu glavni domaćini bili ministar Zukan Helez i zamjenik ministra odbrane BiH za resurse Aleksandar Goganović. Na samom početku sastanka, pomoćnik ministra odbrane BiH za međunarodnu saradnju Zoran Šajinović i slovenački vojni ataše u BiH brigadir Tadej Burgar potpisali su Plan bilateralne saradnje MO BiH i MO R. Slovenije za 2025. godinu, koji obuhvata devet različitih zajedničkih aktivnosti u Bosni i Hercegovini i 11 aktivnosti u Sloveniji.





NOVE SPOSOBNOSTI ORUŽANIH SNAGA

Turski antidron sistem Kangal primljen u naoružanje OS BiH

Svečana primopredaja antidron sistema Kangal, kojeg je Ministarstvo nacionalne odbrane Republike Turske doniralo za Oružane snage Bosne i Hercegovine, realizovana je 15. maja u Kasarni OS BiH „Rajlovac“.

Ministar odbrane BiH Zukan Helez potpisao je sertifikate o primopredaji u ime MO BiH, a u ime nacionalne odbrane Republike Turske sertifikate je potpisao vojni ataše R.Turske u BiH, brigadir Murat Kul. Ceremoniji su prisustvovali i ambasador R. Turske u BiH Nj.E. Emin Akseki, zamjenik načelnika Zajedničkog štaba OS BiH za resurse general-major Mirsad Ahmić, komandant Operativne komande OS BiH general-major Mirzet Lubenović, zamjenik komandanta Komande za podršku OS BiH brigadni general dr. Jasmin Čajić, pomoćnik ministra odbrane BiH za politiku i planove Dženan Redžo i ostali predstavnici MO i OS BiH i Ambasade R. Turske u BiH.

Govoreći o značaju ove savremene opreme za OS BiH, u vrijeme kada različite bespilotne letjelice predstavljaju sve veću prijetnju u svijetu, ministar Helez je istakao potrebu da OS BiH prate razvoj savremenih tehnologija i novonastalih prijetnji.

„U posljednje vrijeme, imamo potrebu zaštititi se od neovlaštenog prelijetanja objekata i lokacija OS BiH, te podići sveukupnu sigurnost vojnih lokacija na veći nivo,“ kazao je ministar Helez. „Antidron sistem Kangal koristi najnovije tehnologije za otkrivanje i neutralizaciju dronova, na principu elektronskog djelovanja, čime se omogućava efikasna zaštita objekata od mogućih napada ili neovlaštenih preleta.“
Ministar se posebno zahvalio turskom ambasadoru Aksekiu i vojnom atašeu Kulu za njihov lični angažman na provedbi ovog

i ostalih brojnih pojekata modernizacije OS BiH, koji se provode uz veliku pomoć Republike Turske, kao i podršku na putu BiH ka evroatlantskim integracijama.

„S Bosnom i Hercegovinom imamo neraskidive historijske veze i ona nam je izuzetno važna za mir i stabilnost na Balkanu. I dalje ćemo nastaviti davati punu podršku njenom suverenitetu i teritorijalnoj cjelovitosti, kako kroz učestvovanje u Vijeću za provedbu mira (PIC) i EUFOR-u, tako i kroz dalju podršku Oružanim snagama BiH,“ zaključio je turski ambasador Akseki.





Kangal protivdronski uređaj – TT karakteristike

Naziv sredstva: Kangal protivdronski uređaj

Namjena: Kangal je sredstvo za zaštitu kritične infrastrukture, vojnih područja, strateški važnih urbanih i ruralnih područja od mini/mikro bespilotnih letjelica, dronova i FPV (First Person View) prijetnji.

Proizvođač: Aselsan, R. Turska.

Nivo zaštite od dronova: osnovna.

Dodatni nivo zaštite: zaštita od FPV dronova (dronovi kod kojih operater ima vidik s kamere na dronu).

Radius upotrebe: 360 stepeni, antenski set za djelovanje u više pravaca istovremeno.

Dometa: nije specificirano

Način rada: ometanje frekvencije između drona i upravljačke jedinice - Softkill.

Frekventni opseg: široki frekventni opseg prilagodljiv potrebama korisnika.

Softverski sistem: moguće programirati za nove prijetnje.

Ključna sposobnost: Mogućnost ometanja i „softkill“-a dronova koji koriste sve poznate satelitske i navigacijske sisteme počev od američkog GPS-a, ruskog GLONASS-a, kineskog BEIDOU-a te evropskog GALILEO navigacijskog sistema.

Detaljnije informacije:

Kangal sistem proizvodi turska kompanija ASELSAN i predstavlja osnovni nivo za protivdronsku odbranu kopnene vojske, primarno namijenjenu za odbranu vitalnih objekata.

Radi se o sistemu specijalizovanom za borbu s mikro dronovima, odnosno malim komercijalnim dronovima, pri čemu proizvođač ističe mogućnost odbrane od FPV (first person view) dronova, koji u Ukrajini ostvaruju najveće rezultate na frontu.

Taktičko-tehničke karakteristike:

Radni radius je tajna, ali sposobnost da pokrije baze veličine turskih, ukazuje na vrlo značajne sposobnosti teritorijalne protivdronske odbrane. Prema specifikacijama proizvođača, sistem Kangal je sposoban raditi u radnom radiusu od 360 stepeni i posjeduje antenski set za djelovanje u više pravaca istovremeno.

Kangal posjeduje softverski definisan sistem za ometanje i može se programirati preko cijelog frekvencijskog opsega prema potrebama korisnika. Sistem pruža efikasno i fleksibilno rješenje u skladu sa operativnim potrebama. Sistem se može lako programirati protiv novih prijetnji i pružiti dugotrajnu zaštitu. Autonomija rada na baterijama je po specifikacijama proizvođača približno 60 minuta, pri čemu je spajanjem na snažnije izvore električne energije operativni rad neograničen. Najveća prednost Kangala je prilagodljivost radnog režima. Pojednostavljeno, radi se o sistemu koji prema potrebama korisnika djeluje protiv različitih prijetnji. Kod sistema za protivdronsku odbranu razlikuju se „softkill“ i „hardkill“ načini rušenja dronova.

„Hardkil“ model je rušenje, odnosno pogodak kinetičkim udarima, odnosno raketama, različitim tipovima municije, laserima i dr. „Softkill“ sistemi su sistemi za elektroničke napade, odnosno ometanja upravljačkog kanala, bio on vođen radio-frekvencijama ili GPS-om uz mogućnost „spofinga“, odnosno potpunog preuzimanja kontrole nad protivničkim dronom. Kangal spada u red sistema za „softkill“ pri čemu je njegova najveća vrijednost i sposobnost u širokom spektru radnih mogućnosti.

Prema specifikacijama proizvođača ASELSAN sistem Kangal je sposoban boriti se protiv dronova svih satelitskih i navigacijskih sistema od američkog GPS-a, ruskog GLONASS-a, kineskog BEIDOU-a te evropskog GALILEO navigacijskog sistema.



Jačanje odbrambene saradnje s Republikom Turskom

Zamjenik predsjedavajuće Vijeća ministara i ministar odbrane Bosne i Hercegovine Zukan Helez, 12. aprila je boravio u Antaliji gdje je, na 4. diplomatskom forumu održao bilateralni sastanak s ministrom odbrane Republike Turske Yaşarom Gülerom.

„Sastanak sa ministrom Gülerom još je jedna snažna potvrda onoga što smo kroz prethodne mjesece gradili: snažna podrška suverenitetu i teritorijalnom integritetu Bosne i Hercegovine te jačanju sistema odbrane i sigurnosti“ istakao je Helez.

Helez je iskoristio priliku da izrazi zahvalnost ministru Güleru, te da zamoli da se posebna zahvalnost prenese predsjedniku Republike Turske Recepu Tayyipu Erdoganu za nedavnu potvrdu i pismo kojim je odobrena donacija dva drona TB2 Bayraktar. Također, zahvalio se i na donaciji manje bespilotne letjelice u okviru NATO programa jačanja odbrambeno-sigurnosnog sistema Bosne i Hercegovine (DCB). Donacija obuhvata i kompletnu obuku pilota i tehničkog osoblja koje će upravljati i održavati ove sisteme. Helez je također naglasio da je potpisani ugovor o donaciji četiri najsavremenija oklopna vozila KIRPI II, kao dio planirane nabavke od ukupno 32 vozila.

Uz navedeno, osigurana je i donacija antidron sistema Kangal, kao odgovor na sve prisutniju prijetnju osmatranja vojnih lokacija, što je ozbiljno shvaćeno u prošloj godini. Značajan iskorak predstavlja i donacija helikoptera UH-1H za potrebe Zračnih snaga OS BiH, čija se isporuka očekuje na jesen 2025. godine. Dogovoren i program obuke osam pilota na simulatorima Bell platforme, čime će se ostvariti značajne uštede u eksploataciji stvarnih helikoptera.

Službena posjeta Azerbejdžanu

Zamjenik predsjedavajuće Vijeća ministara i ministar odbrane Bosne i Hercegovine Zukan Helez sa delegacijom MO BiH 17. i 18. marta boravio je u službenoj posjeti Republici Azerbejdžan.



Prvog dana posjete Republici Azerbejdžan ministar Helez je imao službeni sastanak sa predsjednikom ove zemlje Ilhamom Aliyevim i ministrom odbrane generalpukovnikom Zakirom Hasanovim. Sastancima je prisustvovao i zamjenik ministra odbrane BiH, Slaven Galić.

Ovom prilikom ministar Helez je predsjednika Aliyeva i ministra Hasanova upoznao sa situacijom u našoj zemlji, antidejtonskim, antiustavnim i separatističkim djelovanjem vlasti iz Republike Srpske. Nakon izlaganja ministra Heleza, predsjednik Aliyev je naglasio da R. Azerbejdžan u potpunosti daje podršku Bosni i Hercegovini, njenom suverenitetu, teritorijalnom integritetu i cjelovitosti.

Sa ministrom odbrane Hasanovim dogovoreni su konkretni koraci unapređenja saradnje u oblasti odbrane. Delegacija MO BiH na čelu sa ministrom Helezom sutrađan se sastala s ministrom za odbrambenu industriju Azerbejdžana Vugarom Mustafayevim i predsjednikom odbora azerbejdžanske nacionalne Agencije za deminiranje Vugar Ahad Seleymanovim.

Helez i Goganović primili zamjenika ministra odbrane Slovačke

Ministar odbrane BiH Zukan Helez, zajedno sa zamjenikom Aleksandrom Goganovićem, primio je, 9. aprila visoku delegaciju Slovačke Republike, na čelu sa prvim zamjenikom ministra odbrane Slovačke Republike Igorom Melicherom.

Ministar Helez je potvrdio snažnu posvećenost Bosne i Hercegovine euroatlantskim integracijama, naglašavajući važnost daljeg produbljivanja bilateralne saradnje sa Slovačkom Republikom. Naglasio je da Slovačka, kao članica NATO-a, daje značajan doprinos stabilnosti u BiH, kroz angažman u misiji EUFOR ALTHEA. Također je istaknuto da je bilateralni plan saradnje za 2025. godinu u fazi finalizacije, a odbrambena saradnja dviju zemalja ocijenjena je kao izuzetno dobra.

Ministar Helez zahvalio se Slovačkoj Republici na dosadašnjim donacijama za OS BiH, kao i na podršci Inicijativi za izgradnju odbrambenih kapaciteta (DCB), kroz koju NATO pruža materijalnu i stratešku podršku BiH. Posebno je naglašena potreba za nabavkom stacionarnog radara za kontrolu zračnog prostora, uz nastavak korištenja DCB paketa u te svrhe.





Ministar Helez sa državnim ministrom za pitanja odbrane Emirata

Zamjenik predsjedavajuće Vijeća ministara BiH i ministar odbrane Zukan Helez, trećeg dana radne posjete Ujedinjenim Arapskim Emiratom, 19. februara, sastao se s državnim ministrom za pitanja odbrane ove zemlje, Mohammedom bin Mubarak Fadel Al Mazroueieom.

Ministar Helez je u posjeti UAE boravio zajedno sa svojim zamjenikom Slavenom Galićem. Tokom sastanka se zahvalio za pomoć i podršku koju su Ujedinjeni Arapski Emirati pružili Bosni i Hercegovini u proteklom periodu.

Helez domaćin ministru vanjskih poslova Albanije

Zamjenik predsjedavajuće Vijeća ministara i ministar odbrane Bosne i Hercegovine Zukan Helez 21. maja bio je domaćin svečanog ručka priređenog u čast ministra za evropske i vanjske poslove Republike Albanije, Nj.E. Igli Hasanija.

Svečanom ručku, pored ministra Heleza, prisustvovali su i pomoćnik ministra odbrane BiH za međunarodnu saradnju Zoran Šajinović

te otpravnik poslova Ambasade Republike Albanije u BiH Anita Shaqiri.

Nakon ručka, upriličena je ceremonija svečanog otvaranja Ambasade Republike Albanije u Sarajevu. Tom prilikom ministar Helez i ministar Hasani svečanim presjecanjem vrpce otvorili su Ambasadu Republike Albanije u Bosni i Hercegovini. Otvaranje Ambasade Republike Albanije u Sarajevu i susreti na visokom nivou predstavljaju važan korak ka jačanju bilateralnih odnosa, koji će doprinijeti intenzivnijoj političkoj, sigurnosnoj i ekonomskoj saradnji između Albanije i BiH.



Novi koraci ka saradnji s Indonezijom i Malezijom



Zamjenik predsjedavajuće Vijeća ministara Bosne i Hercegovine i ministar odbrane Zukan Helez prvom polovinom juna boravio je na vojnoj izložbi Indo Defence Expo & Forum u Džakarti, glavnom gradu Indonezije, gdje je, uz sve vojne počasti održao sastanak s ministrom obrane Republike

Indonezije Sjfrieom Sjamsoeddinom, kao i sastanak sa zamjenikom ministra obrane Malezije Adlyjem bin Zaharijem.

Uz upoznavanje sa savremenim tendencijama na polju razvoja naoružanja, ovu vojnu izložbu i prigodnu konferenciju ministar Helez je iskoristio da podrži promociju različitih kompanija vojne industrije iz Bosne i Hercegovine te se sastao s predstavnicima indonezijskog državnog preduzeća PT Pindad, koje naoružanjem i vojnom opremom snabdjeva Indonezijske nacionalne oružane snage.

Nako toga je održao i službeni sastanak sa zamjenikom ministra odbrane Malezije Adlyjem bin Zaharijem. Svoju živu diplomatsku aktivnost ministar Helez je s ambasadorom BiH u Indoneziji Nj.E. Arminom Limom i pomoćnikom ministra obrane BiH za međunarodnu suradnju Zoranom Šajinovićem u četvrtak okončao i s predstavnicima indonezijske vanjskotrgovinske komore.

Na sastanku s indonezijskim ministrom odbrane Sjamsoeddinom, ministar Helez je potvrdio interes za unapređenje bilateralne vojne saradnje s Republikom Indonezijom, imajući u vidu odlične međusobne političke odnose naše dvije zemlje, ali i uvažavanje objektivnih ograničenja poput geografske udaljenosti i ograničenih resursa, koji proizilaze iz malog finansijskog izdvajanja za odbranu BiH.

Zamjenik ministra Galić s ministrom odbrane Malezije

Zamjenik ministra odbrane BiH Slaven Galić predvodio je delegaciju MO BiH na prestižnom Međunarodnom vojnom aeromitingu i izložbi vojne opreme LIMA 2025, koji se održavao od 18. do 24. maja u Langkawiju, Malezija.

Učešće delegacije BiH ostvareno je na poziv Ministarstva odbrane Malezije. U sklopu službenog programa, zamjenik Galić sastao se s ministrom odbrane Malezije Mohamedom Khaledom Nordinom, te prisustvovao svečanom otvaranju izložbe.

Tokom posjete, delegacija je obišla izložbene prostore renomiranih kompanija koje predstavljaju najnoviju vojnu tehnologiju, potvrđujući stratešku važnost ovakvih događaja za jačanje međunarodne odbrambene i industrijske saradnje.



Novi partnerski ciljevi saradnje s NATO-om

Delegacija Ministarstva odbrane i Oružanih snaga Bosne i Hercegovine sastala se 24.-25. aprila 2025. godine u Domu Oružanih snaga BiH sa delegacijom Glavnog štaba NATO-a iz Brisela.

Cilj dvodnevnog sastanka dviju delegacija bio je izvršiti analizu drugog dokumenta Individualno prilagođenog partnerskog programa (ITPP), uz sagledavanje svih partnerskih ciljeva te pripremiti obrazloženje za otvaranje novih partnerskih ciljeva: Human Security - ljudska sigurnost i C-UAV - borba protiv bespilotnih letjelica.

Uvodnom dijelu sastanka, u ime Ministra odbrane BiH, obratio se zamjenik načelnika Zajedničkog štaba OS BiH za resurse general-major Mirsad Ahmić. U ime Ministarstva vanjskih poslova obratio se Josip Brkić i vođa delegacije Glavnog sjedišta NATO za PARP Rohan Maxwell iz Brisela. Učesnici skupa bili su rukovodioci organizacionih jedinica MO BiH, predstavnici OS BiH, predstavnici NATO-a iz Brisela i Napulja, NATO Štaba Sarajevo, EUFOR-a, Ministarstva vanjskih poslova BiH i Ministarstva sigurnosti BiH.



Prema novoj metodologiji ovo će omogućiti dugotrajnije i bolje strateško planiranje, smanjiti dupliranje i povećati preglednost ispunjenosti planova. Svake dvije godine će se vršiti revizija ciljeva i procjena stepena implementacije, te će se po potrebi ažurirati.

U drugoj polovini 2025. godine uslijediće priprema i usaglašavanje finalnog dokumenta ITPP-a za BiH.

A5 pod predsjedavanjem BiH u Konjicu

Prvi sastanak Regionalne inicijative Američko – jadranske povelje (A5) pod predsjedavanjem BiH održan je 16. aprila u Konjicu, na nivou resornih pomoćnika Ministarstva odbrane BiH i Ministarstva vanjskih poslova BiH.



Regionalna inicijativa Američko – jadranska povelja (A5) predstavlja strateško partnerstvo koje potiče dobrosusjedске odnose, jača i konsoliduje regionalnu sigurnost i stabilnost, te promovise demokratske vrijednosti i euroatlantske aspiracije u zemljama Zapadnog Balkana. Ove godine Bosna i Hercegovina predsjedava ovom inicijativom.

Domaćin ispred MO BiH bio je pomoćnik ministra odbrane za međunarodnu saradnju, Zoran Šajinović, a ispred MVP BiH bila je V.D. pomoćnik MVP za multilateralne poslove, Aida Hodžić.

Cilj sastanka je potvrditi posvećenost jačanju saradnje između NATO saveza i zemalja članica A5, u skladu s njihovim nacionalnim politikama i prioritetima, te predstaviti plan aktivnosti Bosne i Hercegovine tokom predsjedavanja. Sastanak se odvijao u dvije tematske cjeline:

Predsjedavanje Bosne i Hercegovine u okviru A5 inicijative odražava našu čvrstu opredjeljenost za jačanje sigurnosti i stabilnosti regije, kao i za poticaj procesu evropskih i euroatlantskih integracija i biće usmjereno na daljnje unapređenje međusobne saradnje, analizu izazova, prijetnji i rizika, s ciljem maksimalizacije zajedničkih potencijala i ostvarivanja postavljenih razvojnih i integracijskih ciljeva.

Na sastanku su učestvovalе zemlje članice Američko-jadranske povelje, R. Albanija, Bosna i Hercegovina, Crna Gora, R. Hrvatska, R. Sjeverna Makedonija, Sjedinjene Američke Države i posmatrači.

Predstavnici NATO-a iz Brisela posjetili kasarnu Rajlovac

Predstavnici NATO-a iz Brisela posjetili su pripadnike Oružanih snaga BiH u kasarni Rajlovac, 24. aprila.

Zamjenica pomoćnika Generalnog sekretara NATO-a za operacije, Burcu San ovom prilikom se sa predstavnicima MO i OS BiH zaduženim za rad na aktivnostima vezanim za program NATO DCB (Program pomoći).

Poseban akcenat je dat projektima: Unapređenje sposobnosti VP u sastavu L-INF-BG, Unapređenje izviđačkih sposobnosti

(ISTAR) i Unapređenje infrastrukture na perspektivnim lokacijama (oružarnice). Pripadnici OS BiH delegaciji iz Brisela prezentovali su aktivnosti vezane za program NATO DCB po projektima, a nakon brifinga delegacije su obišle oružarnice u zgradi Straže i hangare gdje će biti smještena vozila VP donirana od strane R. Slovenije.



Prvi inspekcijски let BiH iznad zemalja NATO-a

U sklopu mjera za izgradnju povjerenja i sigurnosti, inspekcijски tim Verifikacijskog centra Oružanih snaga BiH, u periodu od 19. do 23. maja obavio je inspekcijски let iznad SR Njemačke i zemalja BENELUX-a, u skladu sa odredbama ugovora o „Otvorenom nebu“.

Ovaj promatrački let je prvi ovogodišnji let po planu inspekcije po ugovoru o „Otvorenom nebu“, koji je planiran za Bosnu i Hercegovinu te prvi let inspekcijskog tima BiH iznad zemalja članica NATO-a.

Let je obavljen 21. maja specijalizovanim avionom Ministarstva odbrane SR Njemačke tipa Airbus A319 OH.

Na završnom debriefingu održanom 22. maja, na kraju inspekcije, vođe Inspekcijskog i Pratećeg tima su izrazili zadovoljstvo



načinom provođenja promatračkog leta te je istaknuto da je aktivnost protekla uspješno, u slovu i duhu Ugovora o Otvorenom nebu, što doprinosi uspješnoj izgradnji povjerenja i sigurnosti u Evropi i svijetu.

Međuresorna radionica o biosigurnosti i biozaštiti

U organizaciji MO BiH, a u koordinaciji s ostalim resorskim državnim i entitetskim ministarstvima, institucijama i međunarodnim organizacijama, u Sarajevu je sredinom marta održana četverodnevna radionica po inicijativi Program-100 Centra za izvrsnost atomsko-biološko-hemijske odbrane Evropske unije (EU CBRN CoE P-100).



Radi se o edukativnom događaju pod nazivom „P-100: Biosigurnost i biozaštita na prvoj crti odbrane u Istočnoj i Jugoistočnoj Evropi“, tokom koje se u edukativnim raspravama službenici resornih ministarstava i institucija upoznaju s modernim tehnikama i procedurama biosigurnosti i biozaštite na prvoj liniji odbrane.

Događaj je otvorio pomoćnik ministra odbrane BiH za međunarodnu suradnju Zoran Šajinović, u prisustvu koordinatora inicijative EU CBRN Gunay Rzayeva i Asafa Omarova, kao i

glavne nacionalne kontakt osobe projekta Samira Huseinbašića, ministra savjetnika Ministarstva vanjskih poslova BiH te voditelja Projekta u Bosni i Hercegovini, stručnog savjetnika u Ministarstvu odbrane BiH Denisa Selimovića.

„Nakon što su u prethodnom periodu u institucijama BiH uspostavljeni početni operativni kapaciteti te osposobljen respektabilni tim od 10 certifikovanih trenera, držim da je ovo prelomna tačka projekta, u kojoj će naši treneri izvoditi obuku i proigravati scenarije odgovora na izazove biosigurnosti sa dvadeset polaznika iz ključnih nadležnih institucija u našoj zemlji. Sve vas pozivam da iskoristite ovu obuku za dalje unapređenje i olakšavanje ove koordinacije te produbljuvanje naših kontakata i veza“, istakao je tim povodom Šajinović.

Ministartstvo odbrane BiH je nosilac implementacije projekta. Koordinirajući sa Graničnom policijom, Upravom za indirektno opozivanje, Uredom za veterinarstvo, Upravom za zaštitu zdravlja biljaka i Agencijom za sigurnost hrane na nivou BiH, Ministarstvom zdravlja i socijalne zaštite Republike Srpske, Zavodom za javno zdravstvo Federacije BiH i Distriktom Brčko.

Ova faza projekta uspješno je realizovana jer su članovi projektnog tima, certifikovani međunarodni inspektori obučili 20 nacionalnih inspektora koji će u budućnosti provoditi specijalističku obuku u oblasti bio sigurnosti i biozaštite na prvoj liniji odbrane u institucijama Bosne i Hercegovini.

Naredni koraci Bosne i Hercegovine u implementaciji projekta biće izrada Standardnih operativnih procedura te izvođenje zajedničkih terenskih vježbi sa državama iz Jugoistočne i Istočne Evrope, inače učesnica u projektu. Sljedeća planirana vježba je na granici Bosne i Hercegovine i Republike Srbije.

Britanski alumnisti jačaju liderske sposobnosti

Oficiri OS BiH, školovani na prestižnim vojnim akademijama Ujedinjenog Kraljevstva, uspješno su završili zahtjevne terenske aktivnosti orijentacije, komandovanja i odlučivanja.

U saradnji sa Britanskom ambasadom u Sarajevu, pripadnici Oružanih snaga BiH su u sklopu programa postakadenskog razvoja liderstva, sredinom juna, sprovedli niz kompleksnih i terenski zahtjevnih vježbi koje su imale za cilj jačanje individualnih i kolektivnih vojnih vještina. Akcenat je stavljen na razvoj sposobnosti orijentacije na kopnu, donošenje odluka pod pritiskom, komandovanje u realnim scenarijima, kao i logističko planiranje i implementaciju odluka.

Tokom aktivnosti na kopnenom dijelu, izvođeni su zadaci orijentacije u nepoznatom šumskom terenu, upotrebljavajući



klasične vojne metode kartografije i timskog komandovanja. Poseban naglasak bio je, na praktičnoj primjeni znanja stečenog tokom školovanja, uključujući upravljanje rizicima, kontrolu situacije i komunikaciju u timu.

Jedan od ključnih segmenata treninga bio je vezan za more i rijeke – gdje su učesnici izvodili zadatke u prirodnim uslovima, poput stijena na Kornatima i rijeke Une. Uprkos izazovima koje donosi obuka na vodi i vremenski uslovi, oficiri su pokazali visoku spremnost, disciplinu i znanje, uključujući upravljanje čamcima, jedrenje i podizanje jedara, uz neizostavno vođenje evidencije i orijentaciju pomoću pomorskih karata.



PRAKTIČNA OBUKA U JAVNOM NASTUPU

Redovni seminari o Rezoluciji UN 1235 „Žene, mir i sigurnost“ obogaćeni su praktičnom obukom u davanju izjava za medije i izvedbi javnog nastupa.

Na inicijativu Ambasade Kraljevine Norveške u BiH, u program redovnih seminara „Žene u vojnoj službi“, a na temu Rezolucije UN 1325 „Žene, mir i sigurnost“, za pripadnice OS BiH od ove godine uvrštena je i praktična obuka u javnom nastupu.

Cilj je pomoći vojnkinjama, podoficirkama i oficirkama OS BiH, koje pohađaju ove višednevne radionice u Neumu, da unaprijede svoje sposobnosti davanja izjava za medije, odgovaranja na intervjuje i izvođenja javnog nastupa općenito, čime poboljšavaju svoje liderske sposobnosti i jačaju ulogu žene u Oružanim snagama BiH.

Tokom zadnja dva dana radionice, obuka se sastoji iz teoretskih predavanja o komunikacijskim vještinama i pripremi za televizijski intervju te praktičnim vježbama službenog izlaganja i TV intervjuja. Obuku izvode šefica Ureda za odnose s javnošću MO BiH Uma Sinanović i Antonio Prlenda iz ovog Ureda.

Svaka od učesnica radionice ima priliku na vježbama se oprobati u odgovaranju na nekoliko pitanja pred kamerom. Kruna praktične obuke je zajednička evaluacija, kojom se provjerava naučeno i daju konkretni savjeti za buduće javne nastupe i potencijalne buduće izjave za medije.

„Kroz vježbanje komunikacijskih vještina, kako verbalnih, tako i neverbalnih i paraverbalnih, pripadnice OS BiH jačaju svoje sposobnosti izražavanja i ponašanja pred kamerom, čime dobivaju sigurnost za javni nastup, ali i uspješnije izražavanje svojih liderski sposobnosti. Učesnice seminara dolaze sa različitim iskustvom, a ova je obuka dobra prilika da se praktično isprobaju u javnom istupanju, isprave eventualne početničke nespretnosti ili pogreške,“ kaže Uma Sinanović, koja je izrazila zadovoljstvo kako su pripadnice OS BiH prihvatile ovaj vid obuke.

Ove godine seminar provode savjetnik načelnika Zajedničkog štaba OS BiH za rodnu ravnopravnost major Alem Bajrović, civilno lice Zorana Nedić, kapetan Amina Zukić Džomba i stariji vodnik I klase Jelena Anđić, uz učešće predavača brigadira Nemina Lapandića, pukovnika Elvise Blekovića, civilnog lica Nede Borovčanina i pravnog savjetnika NATO Stožera Sarajevo Darija Šikuljka. Posebna predavanja i motivacijska obraćanja održalo je i nekoliko istaknutih generala OS BiH, kao i ambasadorica Kraljevine Norveške u BiH Nj.E. Kathrine Biering.

Seminari „Žene u vojnoj službi“ održavaju se nekoliko puta godišnje, drugu godinu zaredom, u okviru bilateralne vojne saradnje s Kraljevinom Norveškom i uz tehničku podršku NATO Štaba Sarajevo, a temeljem Pravilnika o ravnopravnosti spolova MO i OS BiH. Tokom seminara posebna pažnja posvećuje se jačanju svijesti o značaju rodne ravnopravnosti u oružanim snagama, kao i osnaživanju žena za preuzimanje odgovornih dužnosti u vojnim strukturama. Kroz seminar se obrađuju brojne značajne teme poput integracije rodne perspektive, profesionalnog razvoja, pravnih propisa, problema mobinga, seksualnog i rodno zasnovanog uznemiravanja, balansiranja profesionalnog i porodičnog života i slično. Poseban akcenat stavlja se na praktičnu primjeru odredbi Rezoluciju 1325, koja ove godine obilježava 25 godišnjicu usvajanja.



AMERIČKI BRIGADNI GENERAL MATTHEW A. VALAS:

OS BiH NAPREDUJU U SVOJOJ OSPOSOBLJENOSTI

KOMANDAT NATO ŠTABA SARAJEVO ODGOVORIO JE NA NEKOLIKO PITANJA ZA "NAŠU VOJSKU".

Na čelu ste NATO Štaba Sarajevo već nešto duže od godinu dana. Kako ocjenjujete saradnju s Ministarstvom odbrane Bosne i Hercegovine (MO BiH), Oružanim snagama BiH (OS BiH) i drugim relevantnim bh. institucijama?

NATO Štab Sarajevo ima čestu komunikaciju i pozitivne odnose s ministrom odbrane Bosne i Hercegovine i zamjenicima ministra, kao i načelnikom Zajedničkog štaba Oružanih snaga BiH i njegovim zamjenicima. Moje osoblje redovno saraduje s Ministarstvom sigurnosti, Ministarstvom vanjskih poslova i Parlamentarnom skupštinom BiH. Oni pružaju savjete, pomoć i rade zajedno s kolegama iz Bosne i Hercegovine. To obuhvata rad na planiranju ciljeva rada, izgradnju sposobnosti, angažman na polju obuke i dolazak stručnjaka u Bosnu i Hercegovinu radi unapređenja znanja i sposobnosti. U narednoj godini, ja bih u našem radu volio vidjeti i dalji i veći napredak.

Kako vidite postojeće odnose između Bosne i Hercegovine i Sjevernoatlantskog saveza (NATO), posebno u svjetlu aktuelnih partnerskih ciljeva i aktivnosti u okviru partnerstva BiH i NATO-a?

Glavna misija NATO Štaba Sarajevo odnosi se na polje reforme sektora odbrane i sigurnosti u Bosni i Hercegovini. Prije nekoliko sedmica smo u saradnji s Republikom Slovenijom zatvorili partnerski cilj vezan za nabavku vozila vojne policije OS BiH. Osim toga, ciljevi u okviru partnerstva BiH i NATO-a, uspostavljeni putem Procasa planiranja i revizije, predstavljaju put i okvir za unapređenje sposobnosti Ministarstva obrane i Oružanih snaga BiH te mehanizam za ocjenu ostvarenog napretka. Ljudstvo MO i OS BiH su svoju osposobljenost pokazali mnogo puta, ali kašnjenje da se završe programi reformi, usvoji budžet, kao i u rješavanju pitanja vojne imovine i dalje ometaju taj napredak.

Nedavno ste prisustvovali vježbi IMMEDIATE RESPONSE 25 u Hrvatskoj, na kojoj su učestvovali i Oružane snage Bosne i Hercegovine. Kako ocjenjujete njihov nivo osposobljenosti i koliko su važne prilike za zajedničku obuku OS BiH s članicama NATO-a?

Oružane snage Bosne i Hercegovine su tokom prošle godine napredovale po pitanju svoje osposobljenosti. Na nedavnoj vježbi IMMEDIATE RESPONSE 25, jedinice Oružanih snaga BiH su se uspješno integrisale s vojnicima Nacionalne garde Marylanda (MNG), odnosno njihovog 115. bataljona vojne policije MNG na izvršavanju zadataka u operacijama podrške miru na bataljonskom nivou. Lično sam imao priliku da prisustvujem vježbi i razgovaram i vidim na djelu podoficire, oficire i vojnike koji su zajednički radili u jednom multietničkom i multinacionalnom okruženju. Pokazali su visoki nivo profesionalizma i sposobnosti za učenje i samorazvoj, kao i poboljšanje svojih jedinica. Također sam bio impresioniran pružanjem logističke podrške na vježbi. Oružane snage BiH su pokazale da znaju koristiti podršku zemlje domaćina, a koju su pružale Oružane snage Republike Hrvatske, da efikasno podrže svoje vojnike van zemlje. To je važna lekcija za buduću saradnju Oružanih snaga BiH i evroatlantskih struktura.

Šta su Vaši budući prioriteti, odnosno najvažnija područja rada u saradnji s Ministarstvom odbrane i Oružanim snagama BiH?

Prioriteti NATO Štaba Sarajevo i dalje ostaju rješavanje izazova reforme sektora odbrane i sigurnosti, jačanje otpornosti i osposobljenosti te postizanje interoperabilnosti Ministarstva odbrane i Oružanih snaga Bosne i Hercegovine sa saveznicima. Prioritet NATO Štaba Sarajevo je i provođenje Pregleda odbrane u cilju uspješnijeg rješavanja pitanja pokretne i nepokretne vojne imovine. Već smo uočili priličan napredak u mnogim područjima, s rezultatima poput razvoja Bataljonske grupe lake pješadije,

najveće jedinice koja je prošla kroz proces sertifikacije u okviru NATO Koncepta operativnih sposobnosti. Osim toga, pružamo podršku putem inicijativa za izgradnju sposobnosti, kao što su Program za unapređenje edukacije u oblasti odbrane i Inicijativa za izgradnju obrambenih kapaciteta. NATO Štab Sarajevo će nastaviti i svoju plodonosnu saradnju s Ministarstvom sigurnosti kako bi BiH poboljšala svoju otpornost i unaprijedila sposobnost upravljanja krizama.



NAŠA VOJSKA
НАША ВОЈСКА



NOVO OKLOPNO VO



ZILO MRAP KIRPI II

Ništa nema časnije nego služiti svojoj domovini Bosni i Hercegovini

Zamjenik predsjedavajuće Vijeća ministara i ministar odbrane Bosne i Hercegovine Zukan Helez 30. maja prisustvovao je svečanoj ceremoniji povodom završetka 16. klase osnovne podoficirske obuke, održanoj u Centru za profesionalni razvoj u Travniku, uz prisustvo zamjenika načelnika Zajedničkog štaba OS BiH generalmajora Tome Kolende, brojnih zvanica i gostiju.



U svom obraćanju, ministar Helez je istakao značaj i doprinos Centra za profesionalni razvoj, koji je do sada uspješno obučio 976 mladih podoficira Oružanih snaga BiH. Naglasio je da ispred prisutnih danas stoji nova generacija, 83 podoficira, među kojima je i devet pripadnica ženskog pola.

„Osnovna podoficirska obuka predstavlja jednu od najzahtjevnijih karijernih obuka u Oružanim snagama BiH. Njeni polaznici su dio obuke završili u Pazariću, a završnu fazu u Centru za profesionalni razvoj, gdje danas i zvanično postaju podoficiri OS BiH,“ rekao je ministar Helez.

Dodao je da njihova uloga od danas dobija novu dimenziju: „Na dužnostima koje vas očekuju više nećete biti samo vođeni, postaćete i vođe. Zapamtite, najvredniji resurs u vojsci je čovjek. Vaš najveći izazov biće odgovorno vođenje ljudi koji vam budu povjereni“.

Ministar se posebno obratio porodicama novih podoficira, ističući da imaju razloga biti ponosni. „U vojsci su red, rad i disciplina na prvom mjestu. Iako smo ih mi vodili kroz proces obuke, ne bismo uspjeli da u njima izgradimo predanost i odlučnost bez temelja koje ste vi postavili kroz kućni odgoj. Ništa nema časnije nego služiti svojoj domovini Bosni i Hercegovini,“ posebno je istakao ministar Helez. Dodao je da je 16. klasa završila obuku bez ijednog disciplinskog prekršaja, uz maksimalno primjereno vojničko ponašanje, kako tokom nastave tako i u slobodno vrijeme.

„Zahvaljujem vam, poštovane porodice, na podršci koju ste im pružili i što ste nam omogućili da radimo s najboljima,“ naglasio je i napomenuo da obuka u vojsci ne prestaje.

„Dok god nosite uniformu, proces učenja se nastavlja. Svima koji žele napredovati i dalje se usavršavati, preporučujem da to i učine“. Sljedeći nivo obuke u Centru biće akademski zahtjevniji, ali će odnos prema vama ostati isti, profesionalan i posvećen.

Najuspješnijim polaznikom u klasi proglašena je Sanela Čajić kojoj je ministar Helez uručio posebnu zahvalnicu za ostvaren uspjeh.

Zamjenik ministra Galić otvorio drugi NATO Forum

Drugi NATO Forum s temom „Angažman i sadržaj misije OS BiH u odgovoru na prirodne i druge nesreće i katastrofe“ započeo je 25. februara u Mostaru, a na samom otvorenju zamjenik ministra odbrane BiH za politiku i planove Slaven Galić istakao je potrebu jačanja kapaciteta OS BiH, ali i pojednostavljenih procedura.

Domaćin trodnevnog foruma je NATO Štab Sarajevo, na čelu sa komandantom američkim brigadnim generalom Matthewom Valasom, uz učešće predstavnika institucija Predsjedništva BiH, Ministarstva sigurnosti BiH i drugih relevantnih tijela, a uz zamjenika ministra Galića i zamjenika ministra odbrane BiH za upravljanje resursima Aleksandra Goganovića, učesvovali su i načelnik Zajedničkog štaba OS BiH generalpukovnik Gojko Knežević sa zamjenikom generalmajorom Mirsadom Ahmićem, pomoćnik ministra odbrane BiH za politiku i planove Dženan Redžo, kao i brigadni generali OS BiH Nebojša Bošnjak i Fahir Žilić.

Skupu s ciljem razmjene iskustava i daljnijeg unaprjeđenja mehanizama za pružanje pomoći civilnim strukturama u slučaju prirodnih nesreća, prisustvovao je i bivši ministar odbrane BiH Sifet Podžić.

Zamjenik Galić je u svom obraćanju naglasio značaj održavanja ovakvih redovnih sastanaka među ključnim institucijama te istakao predanost Ministarstva odbrane BiH unaprijeđenju operativnih kapaciteta za odgovor na prirodne katastrofe.



„Angažman Oružanih snaga BiH u humanitarnim krizama i prirodnim nesrećama izuzetno je važan, a naša je odgovornost osigurati da naše procedure i kapaciteti budu na najvišem mogućem nivou i to pojednostavljeni i u što moguće kraćem roku“, izjavio je Galić, dodajući kako će Ministarstvo odbrane BiH nastaviti raditi na poboljšanjima na ovom polju, u saradnji s partnerima i međunarodnim organizacijama.

NATO Forum je dio kontinuiranih napora za jačanje sposobnosti BiH da se nosi s prirodnim katastrofama i krizama te kako bi se dodatno osigurao koordinirani odgovor svih relevantnih institucija u budućnosti. Jedna od glavnih tema Forumu je pojednostavljenje procedure za angažovanje Oružanih snaga BiH u hitnim situacijama, kako bi se omogućila brža i efikasnija pomoć civilnim strukturama. Učesnici su se nakon prvog Forumu složili da je potrebno dodatno usklađivanje i ubrzanje procesa odobravanja angažmana, a također su istaknuti i prijedlozi za daljnje unaprijeđenje strateškog okvira koji omogućava Oružanim snagama BiH da budu spremne reagovati u najkraćem mogućem roku.

Zamjenik ministra Goganović primio delegaciju američkog instituta ISG

Zamjenik ministra odbrane BiH za upravljanje resursima Aleksandar Goganović, predvodio je tim MO i OS BiH tokom sastanka sa delegacijom Institute for Security Governance (ISG) koji je dio Defense Security Cooperation University iz Sjedinjenih Američkih Država. Institute for Security Governance (ISG) tim je predvodila Lori Renwick.

Zamjenik Goganović je u toku sastanka inicirao i planirao organizaciju obuke pripadnika MO i OS BiH sa ciljem razvoja objektivnosti i kritičkog razmišljanja prilikom procjene situacije i izrade strateških dokumenata, te upravljanja resursima za potrebe odbrane.

Nakon inicijalnog sastanka rad se nastavlja na operativnom nivou sa ciljem da se ova obuka počne sprovoditi u posljednjem kvartalu tekuće godine.



Zamjenik ministra Galić na izložbi ASDA u Zagrebu

Zamjenik ministra odbrane za politiku i planove Slaven Galić prisustvovao je na međunarodnoj izložbi proizvođača naoružanja i vojne opreme "Jadranska vojna i vazduhoplovna izložba i konferencija ASDA 2025".

Tokom izložbe, zamjenik ministra odbrane BiH Slaven Galić, prema pozivu nekoliko firmi održao je sastanke, upoznao se s njihovom ponudom na sajmu te obišao ostatak izložbenog prostora, nakon čega je održao i bilateralni sastanak s državnim sekretarom Ministarstva odbrane Republike Hrvatske, Tomislavom Galićem.

Zagreb je od 8. do 10. aprila ugostio Jadransku vojnu i vazduhoplovnu izložbu i konferenciju (Adriatic Sea Defense & Aerospace Exhibition and Conference-ASDA) u Areni Zagreb. Međunarodno je to događanje posvećeno odbrambenoj, pomorskoj, vazduhoplovnoj i sigurnosnoj industriji, a okupilo je proizvođače, stručnjake i delegacije iz cijelog svijeta te predstavlja najnovija dostignuća u području vojne opreme, tehnologije i sistema za sigurnost.

ASDA se održava svake dvije godine u organizaciji američke firme TNT Productions LLC specijalizirane za organizaciju sajamskih priredbi. Od svog prvog izdanja 2011. godine ASDA je postala ključno događanje u kalendaru međunarodnih vojnih izložbi. Ove godine, pod pokroviteljstvom Vlade Republike Hrvatske



i uz podršku Ministarstva odbrane RH, ASDA se po osmi puta održava u Hrvatskoj, a po prvi puta u njenom glavnom gradu. Više od 236 izlagača iz čak 29 zemalja, predstavili su inovacije svoje odbrambene industrije.

Goganović posjetio Ambasadu Srbije u BiH

Zamjenik ministra odbrane Bosne i Hercegovine za upravljanje resursima Aleksandar Goganović posjetio je 15. aprila Ambasadu Republike Srbije u Bosni i Hercegovini, gdje je razgovarao s ambasadorom Republike Srbije u BiH, Nj.E. Ivanom Todorovim.

Tokom srdačnog i otvorenog razgovora razmijenjena su mišljenja o aktuelnoj geopolitičkoj situaciji, s posebnim naglaskom na važnost očuvanja stabilnosti i sigurnosti u regionu. Zajednički je konstatovana potreba za intenziviranjem daljih napora na jačanju međusobnog povjerenja, mira i stabilnosti, kao ključnih predušlova za ekonomski napredak i dobrobit svih naroda koji žive u ovom dijelu Evrope.





B9 Konferencija načelnika generalštabova zemalja Balkana

Načelnik Zajedničkog štaba OS BiH generalpukovnik Gojko Knežević učestvovao je na Konferenciji načelnika generalštabova balkanskih zemalja B9 koja se održavala od 27. do 29. maja u Istanbulu u Republici Turskoj.

Forum načelnika generalštabova zemalja Balkana predstavlja izuzetno važnu inicijativu za jačanje multinacionalne vojne saradnje u regionu. Članice inicijative su Republika Albanija, Bosna i Hercegovina, Republika Bugarska, Republika Grčka, Sjeverna Makedonija, Rumunija, Republika Srbija, Republika Turska i Crna Gora.

Tokom konferencije izvršena je prezentacija godišnjih izvještaja o radu Koordinacijske grupe, radnih podgrupa za asimetrične prijetnje (ATSWG) i edukaciju, obuku i vježbe (ETESWG), koji su prihvaćeni od strane načelnika generalštabova zemalja članica. Pored toga načelnici su diskutovali na temu: „Vizija korišćenja bespilotnih sistema u budućem operativnom okruženju“, a susret čelnih ljudi oružanih snaga u regionu bio je prilika i za razgovor o drugim temama usmjerenim na jačanje „vojno-vojnih“ odnosa i regionalne sigurnosti.

General Knežević je u svom izlaganju istakao da su OS BiH posvećene daljem jačanju regionalne vojne saradnje i realizaciji zajedničkih aktivnosti u okviru ove inicijative. Nakon izlaganja potpisana je zajednička izjava, kroz koju je dosadašnja saradnja u prethodnom ciklusu ocijenjena kao vrlo uspješna i sadržajna.

Tokom konferencije, general Knežević je imao odvojene bilateralne susrete sa načelnikom generalštaba Oružanih snaga Turske, generalom Metin Gurak i predsjedavajućim Vojnom komitetu NATO-a, admiralom Giuseppe Cavo Dragone.

Na sastanku sa predsjedavajućim Vojnog komiteta NATO-a admiralom Giuseppe Cavo Dragone, zajednički je ocijenjeno da je stepen uzajamne saradnje na visokom nivou, a isti se ogleda kroz saradnju kroz mnogobrojne zajedničke programe i projekte. Zajednička ocjena je, da se mora očuvati stabilnost Zapadnog Balkana.

Na bilateralnom sastanku sa generalom Metinom Gurakom zaključeno je, da svi u regionu moraju učiniti maksimalne napore da se očuva mir i sigurnost.

General Knežević na 55. zrakoplovnom sajmu u Parizu

Načelnik Zajedničkog štaba OS BiH, generalpukovnik Gojko Knežević, prisustvovao je na poziv načelnika Združenog generalštaba Oružanih snaga Francuske, generala Tijerija Birkara, 55. Međunarodnom zrakoplovnom sajmu u Parizu.

Delegacija OS BiH je na pariskom aerodromu „Le Bourget“ bila u prilici da se upozna sa ponudom renomiranih svjetskih kompanija odbrambene industrije i sagleda dostignuća u razvoju zrakoplovstva i zrakoplovnog naoružanja.

Tokom boravka u Francuskoj, general Knežević je imao susret sa načelnikom Združenog generalštaba Oružanih snaga Francuske, generalom Tijerijem Birkarom,

gdje su razmjenjena mišljenja o trenutnoj sigurnosnoj situaciji u regionu Zapadnog Balkana.

General Knežević je također imao sastanak sa vice-admiralom Harve Hamelinom, zamjenikom načelnika Združenog generalštaba za međunarodne odnose, sa kojim je razgovarao o aktuelnim sigurnosnim izazovima u regionu i svijetu, kao i o daljem unapređenju saradnje u oblastima od zajedničkog interesa.

U razgovoru je ocijenjeno da je vojno-vojno saradnja OS BiH i Francuske sadržajna i u funkciji jačanja operativnih sposobnosti oružanih snaga, ali da ima prostora za njeno poboljšanje.

Međunarodni zrakoplovni sajam u Parizu predstavlja najveći aero-miting i izložbeni događaj zrakoplovne industrije u svijetu, a ove godine je učešće na sajmu uzelo gotovo 2500 izlagača iz 48 zemalja svijeta.



General Ahmić na SEDM forumu u Bugarskoj

Delegacija OS BiH učestvovala je na sastanku zamjenika načelnika štabova oružanih snaga zemalja članica inicijative "South-Eastern Europe Defense Ministerial" (SEDM), koji se održavala od 10. do 12. juna u Sofiji, Republici Bugarskoj.

Delegaciju OS BiH predvodio je generalmajor Mirsad Ahmić, zamjenik načelnika Zajedničkog štaba OS BiH za resurse.

„Oružane snage BiH su u proteklom periodu uspješno dostigle puni nivo operativne spremnosti deklarirane Bataljonske grupe lake pješadije u okviru NATO OCC E&F programa, nastavljajući istovremeno širiti bilateralnu i multilateralnu saradnju kroz vježbe

i obuke sa partnerima širom svijeta. Zahvalni smo na kontinuiranoj podršci NATO-a, EU, zemalja-strateških partnera kroz bilateralne sporazume i članica SEDM foruma u modernizaciji i jačanju naših kapaciteta. Nastavljamo aktivno doprinositi regionalnoj stabilnosti i globalnom miru kroz učešće u mirovnim misijama, uz jasno strateško opredjeljenje ka punopravnom članstvu u NATO-u i EU“ - poručio je generalmajor Mirsad Ahmić.

Tokom konferencije prezentirane su aktivnosti i ostvareni rezultati u proteklom jednogodišnjem periodu, a učesnici su razmijenili mišljenja i ideje o budućim pravcima razvoja inicijative, s ciljem daljeg unapređenja vojne saradnje.

Posjeta zamjenika načelnika Komande združenih savezničkih snaga NATO-a

Zamjenik načelnika Zajedničkog štaba Oružanih snaga BiH za operacije, generalmajor Tomo Kolenda, primio je 12. juna u zvaničnu posjetu u Sarajevu zamjenika načelnika štaba Komande združenih savezničkih snaga NATO-a za planove iz Napulja, generalmajora Johna Clarka.

Ova posjeta predstavlja nastavak kontinuiranog dijaloga i saradnje između Oružanih snaga BiH i NATO-a, s ciljem jačanja kapaciteta kolektivne sigurnosti, interoperabilnosti i mira u okruženju.

Tokom sastanka, razgovaralo se o aktuelnim sigurnosnim izazovima, regionalnoj stabilnosti, te ulozi Oružanih snaga BiH u realizaciji svojih zadataka u skladu sa Zakonom o obrani, s posebnim osvrtom na proces deminiranja i pomoći civilnim strukturama uzrokovanih elementarnim nepogodama.

Poseban fokus razgovora bio je usmjeren na zajedničke vježbe i obuke koje se provode uz potporu NATO savezničkih snaga, sa ciljem dodatnog usklađivanja taktičkih i operativnih procedura Oružanih snaga BiH sa NATO standardima. U tom kontekstu,



General Kolenda posjetio vježbu u Turskoj

General-bojnik Tomo Kolenda, zamjenik načelnika zajedničkog stožera Oružanih snaga Bosne i Hercegovine, prisustvovao je Danu visokih zvanica multinacionalne vojne vježbe "Guardian of Peace 25" u Istanbulu, Republika Turska.



U okviru službenog posjeta, general Kolenda imao je priliku pratiti ključne segmente vježbe koja okuplja pripadnika oružanih snaga zemalja članica NATO i partnerskih država s ciljem unapređenja interoperabilnosti i zajedničkog odgovora na suvremene sigurnosne izazove.

Tijekom posjeta, general Kolenda sastao se sa general-bojnikom Subutay Adasom, načelnikom generalstožera za operacije Oružanih snaga Republike Turske, prilikom čega se zahvalio na pozivu za učešće i svakoj potpori koju Oružane snage Republike Turske pružaju Oružanim snagama Bosne i Hercegovine, uz obostarnu želju za nastavkom suradnje što potvrđuje snažnu posvećenost u izgradnji partnerstva kroz razmjenu iskustava i učešće u međunarodnim vježbama i aktivnostima.



Centralna vojna svečanost u povodu 20. godišnjice 1. pješadijskog (gardijskog) puka OS BiH i 33. godišnjica Hrvatskog vijeća odbrane

U organizaciji 1. pješadijskog (gardijskog) puka Oružanih snaga BiH u kasarni „Stanislav Baja Kraljević“ u Mostaru obilježena je 20. godišnjica 1. pješadijskog (gardijskog) puka OS BiH i 33. godišnjica postrojavanja Hrvatskog vijeća odbrane.



Centralnoj vojnoj svečanosti prisustvovali su zamjenik ministra odbrane BiH Slaven Galić, zamjenik načelnika Zajedničkog štaba Oružanih snaga BiH general-major Tomo Kolenda zajedno s generalima Oružanih snaga BiH, predsjedavajući Doma naroda Parlamentarne skupštine BiH i predsjednik Hrvatskog narodnog sabora Dragan Čović, predsjedavajuća Vijeća ministara BiH Borjana Krišto s ministrima i zamjenicima ministara iz reda hrvatskog naroda, ambasador Republike Hrvatske u BiH Nj.E. Ivan Sabolić, zastupnici i predstavnici oba doma Parlamentarne skupštine BiH, vojnodiplomatski kor akreditiran u BiH, predstavnici civilnih vlasti, EUFOR-a, NATO

Štaba Sarajevo i udruženja proisteklih iz Domovinskog rata, bivši pripadnici HVO-a te drugi gosti.

Po dolasku pred svečano postrojene ešalone u kasarni „Stanislav Baja Kraljević“, raport zamjeniku ministra Galiću i generalu Kolendi podnio je brigadir Martin Pažin, komandant 1. pješadijskog (gardijskog) puka OS BiH. Slijedili su intoniranje himne BiH, pa minuta čutnje u čast poginulih pripadnika Hrvatskog vijeća odbrane. Svečani program uljepšala je vokalna solistica Lucija Zovko i Vojni orkestar Oružanih snaga BiH.

Zamjenik ministra odbrane BiH Galić u svom je obraćanju kazao: „Formiranjem Hrvatskog vijeća odbrane stvoreni su uslovi za odbranu i opstanak hrvatskog naroda na prostoru Bosne i Hercegovine, i dužni smo sačuvati identitet vojske koja je u najtežim trenucima branila hrvatski narod. Danas pripadnici 1. pješadijskog puka vrijedno rade s drugim jedinicama na ispunjavanju svih postavljenih zadataka unutar Oružanih snaga BiH na čemu im posebno čestitam. Poštovani vojnici, pripadnici puka, na vama je da širite istinu o Hrvatskom vijeću odbrane i nikada ne zaboravite na poginule pripadnike HVO-a. Neka naslijeđe HVO-a bude svjetionik vama u očuvanju sjećanja na žrtvu i borbu za slobodu“.

„Danas težimo izgradnji društva temeljenog na poštenju, uzajamnom dijalogu i međusobnom poštovanju, gdje

će biti uvažena prava i potrebe svakog naroda uključujući i Hrvate u BiH,“ rekao je Galić. „Hrvati su oduvijek bili sastavni dio zapadne civilizacije te se kao takvi zalažu za članstvo u Evropskoj uniji. Hrvati smatraju da demokratski sistem i visoki pravni standardi EU pružaju snažnu osnovu za promovisanje pravедnosti, osiguravanje njene dosljedne primjene te omogućavanje privrednog razvoja, sigurnosti i trajnog mira. Također, ističemo važnost sprovođenja osnovnih načela demokratije, koja će omogućiti Hrvatima aktivno učestvovanje u političkom procesu, uključujući pravo na slobodan izbor svojih predstavnika na svim nivoima,“ istakao je zamjenik ministra Galić. On je dodao da put ka EU i NATO-u ostaje ključan, jer se samo članstvom u ovim organizacijama može osigurati sigurno i prosperitetno društvo za sve građane, neovisno o njihovoj etničkoj ili vjerskoj pripadnosti.





Svečano obilježena 20. godišnjica 2. pješadijskog (rendžerskog) puka OS BiH i 33. godišnjica formiranja Armije RBiH

Svečana ceremonija obilježavanja 20. godišnjice 2. pješadijskog (rendžerskog) puka OS BiH i 33. godišnjice formiranja Armije RBiH održana je 15. aprila na vojnoj lokaciji "Kosova" u Ustikolini.



Pored ministra odbrane BiH Zukana Heleza, svečanosti ceremoniji prisustvovali su predstavnici Predsjedništva BiH, zamjenik načelnika Zajedničkog štaba OS BiH za resurse general-major Mirsad Ahmić, generali OS BiH, predstavnici MO i OS BiH, predstavnici zakonodavne i izvršne vlasti svih nivoa u BiH, generali Armije RBiH, predstavnici boračkih asocijacija, demobilisani i penzionisani pripadnici ARBiH i OS BiH, predstavnici vjerskih i međunarodnih organizacija u BiH i vojno-diplomatskog kora akreditiranog u BiH, kao i ostali gosti iz javnog i kulturnog života u BiH.

Na svečanosti su se prisutnima obratili ministar odbrane Zukan Helez i

komandant 2. pješadijskog (rendžerskog) puka OS BiH brigadir Faruk Ganić. Ministar Helez je na početku obraćanja odao počast šehidima i poginulim borcima odbrambeno-oslobodilačkog rata.

"U borbi za goli život, Armija Republike Bosne i Hercegovine je sačuvala svoj obraz i svoje dostojanstvo. Koncept odbrane je bio apsolutno suprotan agresorskom konceptu etničkog progona, masovnih ratnih zločina i genocida. Nikada ne smijmo dozvoliti da se izjednačavaju legalno i nelegalno, humano i zločinačko, civilizacijsko i anticivilizacijsko. Ideja i naslijeđe Armije RBiH danas i zauvijek trebaju da bude putokaz kako se brani i čuva naša jedina domovina Bosna i Hercegovina", istakao je Helez.

"Jačajući Oružane snage BiH, mi jačamo Bosnu i Hercegovinu. Država BiH ima možda i najstarije granice i elemente državnosti od svih država u region. Mi moramo nastaviti razvijati našu domovinu Bosnu i Hercegovinu, raditi na sebi, učvršćivati naša prijateljstva te stvarati nova, razvijati Oružane snage naše zemlje, ulagati u mlade, ulagati u obrazovanje. Samo tako ćemo našu zemlju učiniti sigurnom i slobodnom, mjestom ugodnog življenja za sve njene građane", poručio je ministar Helez.

Nakon obraćanja ministra odbrane pročitane su čestitke upućene od članova Predsjedništva BiH.



Komandant puka brigadir Ganić podsjetio je na genezu razvoja Armije RBiH, te rezultate koje su ostvarili pripadnici 2. pješadijskog (rendžerskog) puka OS BiH.

Ministar Helez je nakon svečane ceremonije položio cvijeće na Spomen-obilježje šehidima i poginulim borcima, te Spomen-obilježje ubijenoj i nastradaloj djeci iz perioda 1991.-1995. godine u Goraždu



Obilježen Dan 3. pješadijskog (Republika Srpska) puka OS BiH i Dan Vojske Republike Srpske

U kasarni „Kozara“ Oružanih snaga Bosne i Hercegovine u Banjaluci, 12. maja svečano je obilježen Dan 3. pješadijskog (Republika Srpska) puka Oružanih snaga Bosne i Hercegovine, koji se istovremeno obilježava i kao Dan Vojske Republike Srpske.



Svečanosti u kasarni „Kozara“ prisustvovali su predsjedavajuća Predsjedništva Bosne i Hercegovine Željka Cvijanović, zamjenik ministra odbrane BiH za upravljanje resursima Aleksandar Goganović, načelnik Zajedničkog štaba OS BiH general-pukovnik Gojko Knežević, te brojni predstavnici političkog i javnog života, nevladinih organizacija i udruženja proisteklih iz Odbambeno-otadžbinskog rata.

Parastosom poginulim borcima VRS i civilnim žrtvama Odbambeno-otadžbinskog rata započelo je svečano obilježavanje, nakon čega su u Spomen-sobi VRS položeni vijenci i cvijeće. Potom je na stadionu kasarne „Kozara“ uslijedilo svečano postrojavanje jedinica 3. pješadijskog (Republika Srpska) puka OS BiH i predaja raporta komandanta puka, brigadira Gorana Maksimovića, predsjedavajućoj Predsjedništva Bosne i Hercegovine Željki Cvijanović, u sklopu kojeg je upriličen i kulturno-umjetnički program i obraćanja najviših zvaničnika.

U svom obraćanju, zamjenik ministra odbrane BiH za upravljanje resursima Aleksandar Goganović istakao je da je odluka Narodne skupštine Republike Srpske o formiranju Vojske Republike Srpske (VRS) bila hrabra i historijska. „Vojska Republike Srpske imala je zadatak da odbrani teritoriju Republike Srpske i srpski narod na njegovim vjekovnim ognjištima“, istakao je Goganović.

Goganović je također napomenuo da je obilježavanje Dana VRS prilika za prisjećanje na poginule vojnike, pripadnike Vojske Republike Srpske i civilne žrtve rata, koji su za Srpsku dali najvrednije što su imali - život, a da bi danas srpski narod živio u miru i slobodi.

„Njihova žrtva nas obavezuje da ih se sjećamo i da im se odužimo tako što ćemo čuvati i braniti našu Republiku Srpsku“, rekao je Goganović, te poručio da se prošlosti treba sjećati, ali da nas to ne smije ometati u stvaranju prosperitetne budućnosti za sve građane BiH.



U prepunoj koncertnoj dvorani Kulturnog centra - Banskog dvora 11. maja održan je svečani koncert u povodu godišnjice 3. pješadijskog (Republika Srpska) puka OS BiH, ujedno Dana VRS, a nastupili su vojni orkestar OS BiH i Policijski orkestar MUP-a Republike Srpske.

Svečana ceremonija uručivanja činova novopostavljenim generalima

Svečana ceremonija na kojoj su brigadiri na generalskim pozicijama u Oružanim snagama BiH unaprijeđeni u čin brigadnog generala, a Parlamentarnom vojnom povjereniku BiH dodijeljena Zlatna plaketa Ministarstva odbrane Bosne i Hercegovine održana je u Domu OS BiH, 31. januara.

Ministar odbrane BiH Zukan Helez se obratio prisutnima i istakao da se ovim završava proces promjene generalske strukture Oružanih snaga BiH započete prije godinu dana.

„Prethodnu godinu, koju ste proveli obnašajući dužnosti na koje ste imenovani, pokazali ste da nisam pogriješio prilikom vašeg odabira. Uprkos brojnim poteškoćama, rukvođeci OS BiH dokazali ste da su Oružane snage BiH nezamjenjiv faktor i partner građanima i civilnim strukturama i najbolji dio bosanskohercegovačkog društva. Uručenje Zlatne plakete MO BiH parlamentarnom vojnom povjereniku, gospodinu Bošku Šiljegoviću predstavlja priznanje za dugogodišnju uspješnu saradnju gospodina Šiljegovića sa MO i OS BiH. Njegova posvećenost unapređenju prava i standarda pripadnika naših Oružanih snaga, kao i njegov rad na jačanju institucija odbrambenog sistema, zaslužuju najviše poštovanje.

Dragi prijatelji, reforma odbrane naše zemlje je najuspješnija poslijeratna reforma u BiH. Oružane snage BiH su multietničke i prisutne su na svakom dijelu naše zemlje. Građani u BiH znaju da mogu računati na njih u svakom momentu“, kazao je Helez.

Naredbe o činovanju i oznake čina brigadnog generala uručene su dosadašnjim brigadirima: Edinu Faki, Nebojši Bošnjaku, Martinu Propadalu, Jasminu Čajiću, Slavenu Blavickom, Fahiru Žiliću i Miloradu Krajšumoviću.

Parlamentarni vojni povjerenik Bosne i Hercegovine Boško Šiljegović primio je Zlatnu plaketu Ministarstva odbrane BiH, kao priznanje za značajan doprinos unapređenju odbrambenog sistema Bosne i Hercegovine.





SIGURNOST GRAĐANA PRVI PRIORITY

Pod predsjedanjem zamjenika načelnika Zajedničkog štaba Oružanih snaga BiH za resurse generalmajora Mirsada Ahmića, te prisustvo zamjenika načelnika ZŠ OS BiH za operacije generalmajora Tome Kolende i visokih zvaničnika međunarodnih partnera u BiH, 30. juna, u prostorijama UNDP-a u BiH, održana je 25. sjednica Strateškog komiteta za naoružanje, municiju i minsko-eksplozivna sredstva (Strateški komitet za NMiMES), uz podršku UNDP-a u BiH.

Na sjednici se razgovaralo o realizaciji aktivnosti vezanih za naoružanje, municiju i minsko-eksplozivna sredstva (NMiMES), stepenu realizacije projekata UNDP-a u BiH i Misije OSCE-a u BiH, podršci EUFOR-a, NATO-a i infrastrukturnim projektima s ciljem podizanja stepena sigurnosti, te izazovima i budućim aktivnostima.

U uvodnom izlaganju general Ahmić je izrazio posebnu zahvalnost rezidentnom predstavniku UNDP-a u BiH Renaud Majeru na podršci u organizaciji ove sjednice, kao i svim članicama Strateškog komiteta.

„Zahvaljujući podršci OSCE-a, UNDP-a, EUFOR-a, NATO-a i brojnih zemalja donatora, realizirani su značajni projekti koji su rezultirali modernizacijom skladišta naoružanja i municije, unaprijedili fizičku sigurnost objekata i znatno smanjili količine nestabilne municije i minsko-eksplozivnih sredstava. Međutim, obzirom na važnost stalnog praćenja kvalitete municije, ove aktivnosti ćemo nastaviti i u narednom periodu. I dalje postoji značajna količina zaliha koje mogu predstavljati sigurnosni, ekološki i logistički izazov, jer dio municija starijeg porijekla, usljed dugotrajnog skladištenja, te se stoga mora

stalno pratiti i pravovremeno reagovati eventualnom demilitarizacijom,“ rekao je general Ahmić.

General Ahmić je istakao važnost kontinuiranog unaprijeđenja tehničkih i sigurnosnih standarda, za šta je potrebno osigurati dodatnu finansijsku podršku. On je napomenuo da su 2006. godine OS BiH naslijedile oko 38.000 tona MiMES-a, te da je do danas, u cjelokupnom procesu svim metodama ukupno riješeno oko 23.000 tona nestabilne municije, mina i minsko-eksplozivnih sredstava, bez incidenata i neželjenih posljedica.

Naglasio je važnost dalje podrške svih međunarodnih partnera, kako na unapređenju tehničkih i fizičkih standarda skladištenja MiMES-a, kao i edukaciji personala, zahvalivši svim partnerinima i članovima Strateškog komiteta, koji su uložili i dalje ulažu značajna finansijska sredstva, radi povećanja sigurnosti na lokacijama skladištenja, a time i sigurnosti svih građana BiH. Za projekte u 2025 godini osigurana su finansijska sredstva, a za one planirane u 2026. godini se također očekuje podrška međunarodnih partnera.





Promocija Etičkog kodeksa ponašanja pripadnika MO i OS BiH na društvenim mrežama

U organizaciji Generalnog inspektorata MO BiH, 18. juna u Domu OS BiH održan je sastanak na kome se razgovaralo o sadržaju i implementaciji nedavno usvojenog proceduralnog dokumenta "Etički kodeks ponašanja pripadnika MO i OS BiH na društvenim mrežama i online platformama".

Domaćin sastanka bio je Generalni inspektor brigadni general Edin Fako sa saradnicima, a sastanku su prisustvovali predstavnici MO i OS BiH, OSCE-a u BiH, Parlamentarni vojni povjerenik u BiH, predstavnica Komisije za odbranu i sigurnost Parlamenta BiH, predstavnici Direkcije za koordinaciju policijskih tijela i predstavnik Transparency International BiH.

Generalni inspektor je u svom obraćanju naglasio veliki značaj izrade ovog dokumenta: "U cilju sprječavanja neodgovornog ponašanja zaposlenih u MO i OS BiH prilikom korištenja društvenih mreža i online platformi, a samim tim i onemogućavanja neetičnog ponašanja, podriivanja discipline, narušavanja međuljudskih odnosa i ugrožavanja ugleda MO BiH i OS BiH urađen je dokument

pod nazivom "Etički kodeks ponašanja pripadnika MO i OS BiH na društvenim mrežama i online platformama", koji je nedavno stupio na snagu. Incijator izrade dokumenta bio je Parlamentarni vojni povjerenik u BiH.

Ovim Kodeksom definisana su pravila i principi odgovornog ponašanja prilikom ličnog korištenja društvenih mreža i online platformi od strane zaposlenih u MO BiH i OS BiH, istim nije dozvoljeno bilo koje djelovanje ili akcija koja šteti integritetu u pogledu odbrambenog sistema.

"Živimo u veoma izazovnom vremenu i bitno je ponašanje svakog pojedinca. Moderna tehnologija nam pruža izgradnju većeg stepena profesionalizma, ali i prostor za zloupotrebe. Ovim dokumentom onemogućavamo zloupotrebe i svaki prekršaj istog podrazumijeva disciplinsku odgovornost", rekao je general Fako.

Vojni povjerenik Boško Šiljegović je istekao zadovoljstvo činjenicom donošenja ovog dokumenta. "Kodeks onemogućava da politika i nacionalizam budu prisutni u uniformisanom ambijentu".

U izradi Kodeksa su pored predstavnika MO i OS BiH i OSCE-a u BiH, učestvovali i predstavnici Ureda Parlamentarnog vojnog povjerenika u BiH, akademske zajednice, NATO štaba Sarajevo, policijskih struktura u BiH i nevladinog sektora.

Donirana informatička oprema od strane Vlade SAD

Ceremonija primopredaje donirane informatičke opreme od strane Vlade Sjedinjenih Američkih Država za Ministarstvo odbrane i Oružane snage Bosne i Hercegovine, realizovane putem FMS Programa inostrane vojne prodaje (Foreign Military Sales) upriličena je 17. aprila u Rajlovacu.

Oprema koja uključuje savremene računare, softverske alate, fotoaparate, video kamere, printere, audio-vizualnu tehniku i svu drugu prateću opremu, namjenjena je za unapređenje kapaciteta u oblasti odnosa s javnošću u MO i OS BiH. Donirana sredstva će omogućiti modernizaciju tehničke infrastrukture, efikasniju komunikaciju i pravovremeno informisanje javnosti o aktivnostima MO i OS BiH.

Donacija predstavlja nastavak snažne i dugoročne podrške koju SAD pružaju MO i OS BiH u procesu jačanja institucionalnih kapaciteta, a ista će doprinjeti transparentnosti rada i jačanju povjerenja javnosti u odbrambeni sektor.

Posebno je važno naglasiti osposobljavanje odjeljenja za odnose s javnošću u podređenim jedinicama Operativne komande i Komande za podršku OS BiH za brzu, tačnu i profesionalnu komunikaciju, što je od ključne važnosti za izgradnju povjerenja građana i promociju aktivnosti koje se svakodnevno provode u OS BiH.

Pomoćnik ministra odbrane BiH za međunarodnu saradnju Zoran Šajinović izrazio je zadovoljstvo ostvarenom saradnjom



koja će rezultovati unapređenju odnosa s javnošću u MO i OS BiH, te naglasio kako će donirana savremena oprema doprinjeti efektivnijem djelovanju te boljoj koordinaciji od najnižeg do najvišeg nivoa unutar odbrambenog sistema.

Načelnik Odjeljenja za podršku Zajedničkog štaba OS BiH brigadir Nermin Lapandić zahvaljujući se Ambasadi SAD u BiH, što prepoznaje važnost OS BiH u razvoju stabilnog i pravednog društva naglasio je, da ovakva donacija koja ima neprocjenjivu vrijednost daje dodatnu snagu da se nastavi misija Medijsko-informativnog centra u odgovornom informisanju javnosti.

Primopredaja opreme čija ukupna vrijednost iznosi 455 000 američkih dolara upriličena je u hangaru za održavanje helikoptera, koji je također putem navedenog programa doniran za OS BiH, a na istoj su pored predstavnika iz MO i OS BiH prisustvovali i pripadnici Ureda za odbrambenu saradnju Ambasade SAD u BiH.

OS BiH UVIJEK NA POMOĆI STANOVNIŠTVU

Kako su u protekloj godini realizovane brojne aktivnosti na pomoći civilnim strukturama u slučajevima prirodnih katastrofa i nesreća, projektima humanitarnog deminiranja i drugim vidovima civilno-vojne saradnje, tako su i u 2025. godini nastavljene aktivnosti podrške i saradnje pripadnika Oružanih snaga BiH sa civilnim strukturama.

Pomoć civilnim strukturama u općini Vlasenica



Na osnovu zahtjeva lokalnih vlasti općine Vlasenica, te odobrenja Predsjedništva BiH, Oružane snage BiH početkom aprila 2025. godine angažovale su ljudske i materijalne resurse za potrebe pružanja pomoći civilnim strukturama u reagovanju na prirodnu nesreću i saniranju posljedica izazvanih obilnim kišnim padavinama u općini Vlasenica.

Upotrebom inženjerske mehanizacije, pripadnici Oružanih snaga BiH radili su na čišćenju korita lokalnog potoka i izgradnji puta uz korito potoka te uređenju gradske deponije, koja je ugrožavala lokalno stanovništvo od širenja zaraze. Posvećenost pripadnika Oružanih snaga BiH u pružanju pomoći građanima u kriznim situacijama ostaje jedan od prioritarnih zadataka Oružanih snaga BiH.

Uspješno deminirane nove površine

Oružane snage BiH su u 2024. godini, pored suočavanja sa različitim izazovima, Plan protivminskih akcija realizovale u

procentu od 61,28%. Deminirano je 903.326 m², a krajnjem korisniku, odnosno civilnim strukturama i lokalnoj zajednici, vraćeno je na upotrebu 14.732.303 m². U 2024. godini deminerski kapaciteti Oružanih snaga BiH djelovali su na prostoru 18 općina u Bosni i Hercegovini, od toga 13 općina u FBiH i pet općina u Republici Srpskoj.

Proces deminiranja u 2024. godini pored državnih struktura Bosne i Hercegovine podržan je i od strane njemačke, američke, austrijske i ostalih ambasada u BiH. Pored toga, značajan doprinos u opremanju i podizanju deminerskih kapaciteta dala je i Evropska komisija u BiH, koja je kroz EU fondove nabavila vozila za prevoz deminera, sanitetska vozila, deminerske mašine, GPS uređaje i dronove, što je složeni proces deminiranja olakšalo i dalo novi zamajac u korištenju savremenih metoda i postupaka deminiranja.

Ove godine, sa svim kapacitetima i opremljenosti za implementaciju plana protivminskih akcija za 2025. godinu, Oružane snage BiH planiraju da sa 34 manualna tima, četiri tima sa psima za otkrivanje eksploziva i četiri tima za mehaničku pripremu zemljišta deminiraju 1.616.683 m². Planirano djelovanje deminerskih kapaciteta Oružanih snaga BiH na 35 deminerskih projekata i to 23 projekata na teritoriji FBiH i 12 projekata na teritoriji RS, a proces deminiranja će se odvijati na teritoriji 23 općine u Bosni i Hercegovini. Po metodama deminiranja, planirano je da se metodom tehničkog izviđanja deminira 1.616.683 m², a plan za 2025. godinu predviđa da se krajnjem korisniku vrati ukupno 25.240.446 m².

Uspjesi Deminerskog bataljona Brigade taktičke podrške OS BiH, istaknuti su na Godišnjoj analizi deminiranja za 2024. godinu, koja je realizovana 23. aprila u kasarni „Rajlovac“. Analizi su prisustvovali predstavnici Ministarstva odbrane i Oružanih snaga BiH, Parlamentarne skupštine BiH, Komisije za deminiranje, vladinih i nevladinih organizacija i vojno-diplomatski predstavnici akreditovani u BiH.

Komandant Operativne komande Oružane snage BiH general-major Mirzet Lubenović pohvalio je profesionalizam i zalaganje deminera, kao i saradnju sa lokalnom zajednicom, a posebno saradnju sa vladinim i nevladinim sektorom i stranim ambasadama i organizacijama u BiH koje podržavaju proces deminiranja.





Civilno-vojni kurs za upravljanje krizama Modula II

Aktuelna događanja na globalnom, ali i domaćem planu, kada su u pitanju prirodne i druge katastrofe i nesreće, bila su razlog više za održavanje Civilno-vojnog kursa za upravljanjem krizama Modul II (Civil Military Crisis Management Course – CCMC, Modul II), koji se održavao u Sarajevu od 5. do 8. maja. Kurs je proveden u organizaciji Ministarstva odbrane i Oružanih snaga BiH i podršku Savezne Republike Austrije kroz Plan bilateralne vojne saradnje dvije zemlje za 2025. godinu. Pored predstavnika Ministarstva odbrane i Oružanih snaga BiH, u radu kursa su učestvovali i predstavnici Ministarstva sigurnosti BiH, Federalne uprave civilne zaštite Federacije Bosne i Hercegovine, Republičke uprave civilne zaštite Republike Srpske, Odjeljenja za javnu sigurnost Brčko distrikta, Crvenog krsta BiH, kao i predstavnici ministarstava odbrane Republike Sjeverne Makedonije, Crne Gore, Republike Srbije te Saveznog

ministarstva odbrane Republike Austrije.

Glavni cilj kursa bio je unapređenje međusobnog razumijevanja, izgradnja povjerenja i osnaživanje regionalnih mehanizama za odgovor na krize, kako bi se u vanrednim okolnostima efikasnije zaštili životi građana i ključna infrastruktura. Pored praktičnih vježbi, učesnici kursa su imali priliku da posjete i Centar za obuku za operacije podrške miru (PSOTC) i Operativno-komunikacijski centar Ministarstva sigurnosti BiH.

Podrška međunarodnom skijaškom takmičenju „Evropa kup“ na Bjelašnici

Ustupanjem svojih resursa, materijalno-tehničkih sredstava (MTS) i ljudstva te angažmanom helikoptera Oružanih snaga BiH za medicinsku evakuaciju zračnim putem, Ministarstvo odbrane BiH i Oružane snage BiH pružile su podršku Olimpijskom centru ZOI 84 u organizaciji međunarodnog skijaškog takmičenja „Evropa kup - superveleslalom za muškarce – Bjelašnica“,

koje se održavalo od 21. do 22. februara.

„Veliko hvala Oružanim snagama BiH na podršci i profesionalizmu tokom FIS Evropa kupa 2025 na Bjelašnici! Njihov angažman, uključujući helikoptersku podršku, ključan je za sigurnost takmičara, organizatora i svih prisutnih“, stoji u Facebook objavi Olimpijskog centra Bjelašnica.

MOiOS BiH će u skladu sa svojim zakonskim nadležnostima i u narednom periodu nastaviti aktivnosti na pomoći civilnim organima, kroz angažman Oružanih snaga BiH za potrebe pružanja pomoći civilnim organima u prirodnim i drugim nesrećama, procesu deminiranja prema planskim aktivnostima za 2025. godinu, ustupanju na privremeno korišćenje objekata i MTS Oružanih snaga BiH civilnim strukturama iz vladinog i nevladinog sektora, podršku ceremonijalnim i svečanim aktivnostima institucija vlasti, kao i saradnju sa udruženjima građana, sportskim društvima, i slično.



Inspekcija u Bosni i Hercegovini od strane Republike Hrvatske

Verifikacijski centar ZŠ OS BiH prihvatio Inspeksijski tim Republike Hrvatske, koji je proveo inspekciju jednog predmeta inspekcije u Bosni i Hercegovini, od 6. do 8. maja u skladu sa odredbama Sporazuma o subregionalnoj kontroli naoružanja, Član IV, Aneks I-B, Opšteg okvirnog Sporazuma za mir u Bosni i Hercegovini.

U sastav Inspeksijskog tima Republike Hrvatske pridružen je gost promatrač OESS-a iz Kraljevine Nizozemske, a timu Bosne i Hercegovine bila su pridružena dva gosta promatrača OESS-a i to iz Francuske Republike i Velike Britanije.

Prvog dana inspekcije, Inspeksijski tim Republike Hrvatske posjetio je lokaciju OS BiH kasarnu „Vojvoda Radomir Putnik“ u Doboju gdje je navedeni tim prihvaćen od strane pukovnika Vitomira Stevanovića, predstavnika Komande logistike i komandanta artiljerijskog bataljona pukovnika Miće Ilića. Pukovnik Stevanović je u skladu sa odredbama Sporazuma prezentirao briefing lokacije, a pukovnik Ilić briefing predmeta inspekcije. Poslije prezentacije briefinga inspeksijski tim je izvršio obilazak i brojanje



sredstva ograničenih Sporazumom o subregionalnoj kontroli naoružanja koja pripadaju predmetu inspekcije. Inspeksijski tim Republike Hrvatske konstatovao je da se Bosna i Hercegovina kao jedna od Stranaka u Sporazumu u potpunosti pridržava odredbi propisanih Sporazumom o Subregionalnoj kontroli naoružanja.

Na završnom debriefingu održanom na kraju inspekcije, vođe Inspeksijskog i

Pratećeg tima kao i gosti promatrači iz OESS-a su izrazili zadovoljstvo načinom provedbe inspekcije te je istaknuto da je aktivnost protekla uspješno, u skladu sa slovom i duhom Sporazuma o subregionalnoj kontroli naoružanja, što doprinosi uspješnoj izgradnji povjerenja i sigurnosti u regionu jugoistočne Europe.

Verifikacijski centar OS BiH izvršio inspekciju u Republici Srbiji

Verifikacijski centar ZŠ OS BiH formirao je inspeksijsku ekipu Bosne i Hercegovine, koja je provela inspekciju dva predmeta inspekcije u Republici Srbiji, u periodu od 27. do 30. maja, u skladu sa odredbama Sporazuma o subregionalnoj kontroli naoružanja.

U sastav inspeksijske ekipe Bosne i Hercegovine pridružen je gost posmatrač OESS-a, penzionisani brigadir Robin Mossinkoff, a ekipi Republike Srbije bila su pridružena dva gosta posmatrača OESS-a i to iz Rusije i Bjelorusije.

Prvog dana inspekcije, inspeksijska ekipa Bosne i Hercegovine posjetila je kasarnu „Knjaz Mihailo“ u Nišu, gdje je navedena ekipa prihvaćena od strane pukovnika Zorana Cvetanovića iz komande 3. brigade kopnene vojske, koji je prezentovao briefing lokacije i predmeta inspekcije. Poslije prezentacije briefinga, inspeksijska ekipa je izvršila obilazak i brojanje sredstva ograničenih Sporazumom o subregionalnoj kontroli naoružanja, koja pripadaju predmetu inspekcije.



Drugog dana inspekcije, inspeksijska ekipa Bosne i Hercegovine je posjetila kasarnu „Stefan Nemanja“ u Raškoj, gdje je navedena ekipa prihvaćena od strane pukovnika Aleksandra Simića komandanta pješadijskog bataljona 2. br. KoV. Pukovnik Simić je prezentovao briefing lokacije i predmeta inspekcije. Poslije prezentacije briefinga inspeksijska ekipa je izvršila obilazak i brojanje sredstva ograničenih Sporazumom o subregionalnoj kontroli naoružanja, koja pripadaju predmetu inspekcije.

Inspeksijska ekipa Bosne i Hercegovine konstatovala je da se Republika Srbija, kao jedna od stranaka u Sporazumu pridržava propisanih odredbi. Na završnom debriefingu održanom na kraju inspekcije, vođe inspeksijske i prateće ekipe kao i gosti posmatrača iz OESS-a izrazili su zadovoljstvo načinom provedbe inspekcije, te je istaknuto da je aktivnost protekla uspješno, u skladu sa slovom i duhom Sporazuma o subregionalnoj kontroli naoružanja, što doprinosi uspješnoj izgradnji povjerenja i sigurnosti u regionu jugoistočne Europe.

Posjeta Komiteta za Evropski instrument za mir

Ministarstvo odbrane i Oružane snage BiH od 2. do 6. juna bili su domaćini posjete delegacije Odbora EU za provođenje Evropskog instrumenta za mir (EPF). Delegacija iz Brisela koja je brojala oko 60 članova, boravila je u Sarajevu sa ciljem sticanja uvida u realizaciju projekata i ukupnu implementaciju sredstava dodijeljenih kroz ovaj značajan evropski mehanizam.

Tokom višednevne posjete delegacija je obišla lokaciju kasarne "Rajlovac", gdje se direktno upoznala sa stanjem opreme koja je donirana u okviru I i II tranše pomoći iz EPF-a. Ova posjeta je omogućila direktan uvid u dosadašnje rezultate podrške EU Oružanim snagama BiH, te identifikaciju potreba i mogućnosti za dalju saradnju. Nakon obilaska terena, održan je radni sastanak u Domu Oružanih snaga BiH, gdje je delegaciju, zajedno sa svojim saradnicima, dočekaio pomoćnik ministra odbrane BiH za međunarodnu saradnju Zoran Šajinović. Tokom sastanka razmjenjene su informacije o postignutim rezultatima, izazovima u procesu implementacije i planovima za naredni period.

Tokom informativnog brifinga, učesnicima sastanka Komandant Brigade taktičke podrške OS BiH brigadir Elvir Faljić se zahvalio na dolasku i dosadašnjim aktivnostima i pomoći koju pružaju Oružanim snagama BiH te upoznao prisutne sa podrškom jedinica OS BiH, a koja se prvenstveno odnosi na doniranu opremu i vozila u okviru I i II tranše pomoći iz EPF-a. Prezentovani su i kapaciteti OS BiH sa opremom i motornim vozilima, koja su donirana putem Evropskog instrumenta za mir.



Delegacija SR Njemačke posjetila Visoko i Butmir

Goti iz Njemačke posjetili lokacije OS BiH 20. i 21. januara, radi uvida u stanje infrastrukturnih projekata koje finansira Vlada SR Njemačke.

Domaćini posjete bili su pomoćnik ministra za nabavku i logistiku Borislav Jezeraškić, zamjenik načelnika Zajedničkog štaba OS BiH general-major Mirsad Ahmić i zamjenik komandanta Komande za podršku OS BiH brigadir Jasmin Čajić sa saradnicima.

Delegaciju Savezne Republike Njemačke činili su vojni ataše njemačke u BiH pukovnik Marc Abendroth, brigadir Hauke

Lützen šef odjeljenja za infrastrukturu, pukovnik Wolf Freiherr von Lyncker, referent za infrastrukturu, te ispred UNDP-a gospodin Tarik Učanbarlić i EUFOR-a pukovnik Martin Trachsler.

Posjeta je realizovana na tri vojne lokacije i to kasarna „Tufo Buza“ (Visoko), kasarna „Zaim Imamović“ (Pazarić) i Centar za obuku za operacije podrške miru (PSOTC) u Butmiru. Gostujuća delegacija je upoznata sa trenutnim stanjem sa svim infrastrukturnim projektima na navedenim lokacijama, a koje finansijski podržava SR Njemačka, također upoznati su i sa prioritarnim potrebama za buduća infrastrukturna ulaganja.

Predstavnici MO i OS BiH su izrazili zahvalnost Vladi SR Njemačke na dosadašnjoj podršci u stvaranju boljih uslova za život i rad pripadnika OS BiH

ističući činjenicu da je SR Njemačka jedan od najvažnijih strateških partnera ne samo OS BiH nego i cijeloj Bosni i Hercegovini. Vlada Savezne Republike Njemačke izdvojila je 6,5 miliona eura u Budžetu za 2024. godinu za realizaciju infrastrukturnih projekata u OS BiH. Ovi projekti se implementiraju u saradnji s partnerima iz Razvojnog programa Ujedinjenih nacija (UNDP).

Svi projekti rekonstrukcije koje finansira SR Njemačka su dio Plana infrastrukturnih radova, koji je izradio Tim za infrastrukturne projekte Ministarstva odbrane i Oružanih snaga BiH. Glavni cilj ovih aktivnosti je osiguranje boljih uslova smještaja i rada za žene i muškarce na službi u OS BiH. Plan infrastrukturnih radova MO BiH obuhvata 29 perspektivnih vojnih lokacija s ukupno 144 predviđene aktivnosti.





Svečanost u povodu završetka radova i otvaranja renoviranog objekta straže u Čapljini

U sklopu projekta „Žene, mir i sigurnost“ i projekta unapređenja sigurnosti, koji finansira Vlada Ujedinjenog Kraljevstva, u kasarni u Čapljini, 27. februara otvoren je renovirani objekat, nakon već uspješnih faza ovog projekta u kasarnama na Manjači i Rajlovcu.

Ovakva ulaganja u infrastrukturu i tehnologiju poboljšavaju uslove rada i

života za muškarce i žene, modernizujući objekte kako bi se ispunili najviši standardi. Poboljšana sigurnost znači efikasnije čuvanje vojnih objekata, a time i oslobađanje trupa za relevantniju obuku. Sa boljim, rodno-inkluzivnim uslovima i mogućnostima, zapošljavanje i zadržavanje talentovanog osoblja će samo jačati.

U svom obraćanju, britanski vojni ataše pukovnik Edward Taylor, istakao je da da

je ovo još jedan korak naprijed u jačanju sigurnosti i operativne efikasnosti za Oružane snage Bosne i Hercegovine. Pukovnik Taylor je naglasio važnost integracije rodne ravnopravnosti u odbrambene institucije i povećanje učešća žena, što su ciljevi podržani kroz projekat „Žene, mir i sigurnost“.

Generalmajor Mirsad Ahmić izrazio je veliko zadovoljstvo zbog uspješne saradnje sa Ujedinjenim Kraljevstvom, kao i zbog saradnje kroz NATO program „Žene, mir i sigurnost“. Naglasio je da su preduzeti konkretni koraci na poboljšanje standarda i uslova za boravak straže na lokacijama Oružanih snaga Bosne i Hercegovine. Objekat straže u kasarni „Božan Šimović“ u Čapljini, treći je infrastrukturni projekat realizovan uz finansijsku pomoć Vlade Ujedinjenog Kraljevstva, u okviru projekta „Žene, mir i sigurnost“. Poručnik Armin Beglerović, stručni nadzorni organ ispred izvođača radova, detaljno je predstavio namjenu prostorija tokom obilaska objekta.

Na kraju ceremonije, brigadni general Slaven Blavicki, komandant 4. pješadijske brigade Oružanih snaga Bosne i Hercegovine, zahvalio se Ambasadi Ujedinjenog Kraljevstva Velike Britanije i Sjeverne Irske, koja je inicirala i finansirala ovaj projekat, kao i svim pojedincima i organizacijama koje su svojim angažmanom doprinijele njegovoj realizaciji.

Promocija vojnog poziva upriličena u školama u Čeliću, Teočaku i Odžaku

Lica iz sastava Centra za regrutovanje i tranziciju Tuzla, major Amir Smajlović, načelnik CRT Tuzla, i ci Jadranko Stjepanović, viši stručni saradnik za regrutovanje CRT Tuzla i pripadnici iz drugih jedinica održali su promociju vojnog poziva završnim razredima srednjih škola u opštinama Čelić, Teočak i Odžak.

Osnovni cilj promocije je bio motivisanje učenika da nakon završene srednje škole konkurišu na konkursu za prijem vojnika u OS BiH ili kadete vojnih akademija. Učenici koji su prisustvovali ovom događaju su pokazali veoma dobru zainteresovanost na promociji i postavljali pitanja o životu i radu vojnika, te ostalim mogućnostima koje nudi biranje ovog poziva za životnu profesiju.

Pored usmene prezentacije vojnog poziva instaliran je i privremeni informativni štand učenicima završnih razreda navedenih srednjih škola, te su ustupljeni podsjetnici sa detaljnim uputama o načinu aplikacije, a menadžmentima škola su predani isprintani aktuelni konkursi za vojnike.



Akcija dobrovoljnog davanja krvi u Istočnom Novom Sarajevu

U organizaciji Udruženja dobrovoljnih davalaca krvi Sarajevsko-romanijske regije Istočno Sarajevo, u saradnji sa Službom za transfuziju krvi Bolnice "Srbija" u Kasindolu, u maju je u Sportskoj dvorani u Istočnom Novom Sarajevu održana velika akcija dobrovoljnog davanja krvi.

Akcija je realizovana u periodu od 08.00 do 16.00 časova, a učešće su uzeli pripadnici Ministarstva odbrane i Oružanih snaga BiH, kao i brojni građani i članovi lokalne zajednice. Odziv je bio izuzetno dobar, a prikupljen je značajan broj dragocjenih doza krvi, koje će biti od velikog značaja za liječenje pacijenata širom Bosne i Hercegovine.

Koordinaciju aktivnosti između Ministarstva odbrane BiH i Udruženja vršili su predstavnici ZŠ OS BiH i gospođa Gospava Pejić, koja se zahvalila svim učesnicima i istakla važnost ovakvih humanitarnih akcija.



Hrabar gest pripadnika OS BiH

Pripadnik 2. pješadijskog bataljona, 6. pješadijske brigade, vodnik Aldin Handanagić pokazao je hrabrost i odgovornost spriječivši pokušaj krađe u jednom marketu u Cazinu.

U vanradno vrijeme vodnik Handanagić uočio je nečasnu radnju, pokušaj krađe, te je bez oklijevanja reagovao i pomogao uposlenicima marketa da ga zadrže na licu mjesta do dolaska policijske patrole.

Ovim gestom, vodnik Aldin Handanagić izazvao je poštovanje prisutnih građana, a iskazanim nivoom profesionalizma pokazavši vojničke i ljudske vrline, pokazao da su pripadnici Oružanih snaga Bosne i Hercegovine u svim prilikama i na svim mjestima na usluzi građanima Bosne i Hercegovine.



Pripadnici OS BiH iz „Dubrava” dobrovoljno darivali krvi

Pripadnici OS BiH stacionirani na lokaciji kasarne i aerodroma „Dubrave” u Živinicama po drugi put ove godine organizovano učestvovali u akciji dobrovoljnog darivanja krvi. Akciju je realizovala komanda 5. pbr u koordinaciji sa 5. blp/KL i Odjeljenjem za prikupljanje i konzervaciju krvi, Poliklinike za transfuziologiju, danas u Tuzli.

Od ukupno 23 prijavljena pripadnika, krv je darovalo 20 pripadnika dok ih troje nije dalo iz zdravstvenih razloga.

U januaru, od ukupno 42 prijavljenih pripadnika, krv je darovalo 37 pripadnika, dok ih pet nije moglo iz zdravstvenih razloga. Ovoj dobrovoljnoj akciji darivanja krvi pristupili su pripadnici iz sastava OK OS BiH i KP OS BiH razmještenih na ovoj lokaciji

Vođa tima Poliklinike za transfuziologiju u Tuzli, dr. Dragana Mitrović je po završetku akcije dobrovoljnog davanja krvi izrazila zadovoljstvo odzivom pripadnika OS BiH, na ovoj sada već tradicionalnoj akciji. Takođe istakla je, da pripadnici OS BiH i pored organizovanih akcija, koje se realizuju tri puta godišnje, redovno odazivaju na poziv Odjela za transfuziologiju u slučajevima kada treba hitno osigurati određen broj doza krvi.



SARAJEVO DOMAĆIN CISM BALKANSKOM VOJNOM PRVENSTVU U POLUMARATONU

Oružane snage Bosne i Hercegovine bile su domaćin CISM balkanskog vojnog prvenstva u polumaratonu, (2nd Balkan Games Half Marathon Championship) koje se održalo od 23. do 26. maja u Sarajevu u Velikoj aleji.

Oružane snage BiH pod okriljem Međunarodnog savjeta za vojni sport (CISM) su bili domaćini 2. CISM balkanskog vojnog prvenstva u polumaratonu. Događaj okuplja vojne sportiste iz više balkanskih zemalja, promovišući prijateljstvo kroz sport, zajedništvo i međunarodnu saradnju među pripadnicima oružanih snaga.

Takmičenje je proteklo u fer i sportskom duhu, a svi učesnici su još jednom pokazali izuzetnu fizičku spremnost, borbeni duh i posvećenost vojničkim i sportskim vrijednostima.



Najboljima su uručene medalje i priznanja na svečanoj ceremoniji, čime je simbolično stavljena tačka na ovo značajno sportsko dešavanje koje doprinosi jačanju prijateljskih veza među oružanim snagama zemalja regiona.

CISM (Conseil International du Sport Militaire) predstavlja vodeću međunarodnu vojnu sportsku organizaciju koja promovise mir kroz sport, okupljajući vojne sportiste iz cijelog svijeta. Misija CISM-a je da podržavajući prijateljstvo među vojnicima okuplja osoblje Oružanih snaga svih nacija kroz sportske aktivnosti, omogućavajući im na taj način fizičku obuku i obrazovanje. Moto CISM-a koji se koristi na svim međunarodnim aktivnostima je „Prijateljstvom kroz sport“.



Održane CISM Svjetske vojne zimske igre

Sportska delegacija Oružanih snaga BiH na čelu sa brigadirom Hrvojem Turudićem i majorom Slavišom Vuksanovićem prisustvovala je svečanom otvaranju CISM Svjetskih vojnih zimskih igara, koje se ove godine u periodu od 23. do 30. marta održavaju u Švicarskoj u gradu Lucernu, regija Goms.

Oružane snage BiH, na ovom prestižnom sportskom događaju, gdje je učešće uzelo preko 1.400 pripadnika vojski iz 43 CISM nacije, predstavljalo je 13 sportista u disciplinama: alpsko skijanje - veleslalom i slalom, turno skijanje, kros kantri skijanje, te kros kantri trčanje.



Izvanredni rezultati na Državnom prvenstvu BiH u biciklizmu

Pripadnici Oružanih snaga Bosne i Hercegovine, poručnici Kadija Talić i Vedad Karić, ostvarili su izvanredne rezultate na Državnom prvenstvu BiH u biciklizmu, održanom 17. maja u disciplini brdskog hronometra u Tuzli.

U konkurenciji 18 najboljih biciklista iz BiH, poručnik Vedad Karić (Deminerski bataljon) osvojio je zlatnu medalju, dok je poručnik Kadija Talić (oficir za MFP i kontrolu) zauzeo drugo mjesto, sa vremenom 12 minuta i 7 sekundi, što predstavlja njegov lični rekord.

Obojica sportista su dugogodišnji članovi OS BiH – poručnik Karić od 2011, a poručnik Talić od 2013. godine – i u svojim izjavama naglasili su da vojna disciplina i podrška iz sistema OS BiH imaju ključnu ulogu u njihovom sportskom uspjehu.

Oba oficira će od 20. do 30. maja 2025. godine predstavljati reprezentaciju BiH na dva velika međunarodna takmičenja:

- Balkansko prvenstvo u drumskom biciklizmu u Rumuniji, od 20. do 23. maja, u disciplini „Cdrum i individualni hronometar“
- UCI Race – Tour of Albania 2.2 (utrka iz kalendara Europe Tour) od 26. do 30. maja, u disciplini „etapna drumska utrka“.

U sastavu reprezentacije BiH učestvovat će : Kadija Talić, Vedad Karić, Amir Mahmutović, Anes Čehajić i Tarik Pihljak. Cilj im je ostvariti plasman među najboljih pet na Balkanskom prvenstvu, dok se u Albaniji očekuje ulazak u top 10 generalnog poretka.

Ova dostignuća potvrđuju izuzetnu fizičku spremnost i profesionalizam pripadnika OS BiH, kao i značaj institucionalne podrške razvoju sporta u sistemu odbrane.



Kurban-bajram u OS BiH

Prema planu Ureda Vojnog muftije, 6. juna, Centralna bajramska svečanost u Vojnom muftijstvu realizirana je u mesdžidu vojarne "Rajlovac".



U prisustvu brojnih uposlenika Ministarstva obrane i pripadnika Oružanih snaga Bosne i Hercegovine, bajramsku hutbu je kazivao vojni muftija Nesib-ef. Hadžić, a bajram-namaz predvodio glavni imam Oružanih snaga Haris-ef. Hadžić.

I u mesdžidu vojarne "7. muslimanske brigade" u Zenici klanjan je bajram-namaz kojeg je predvodio štabni imam Adnan-ef. Kovačević. Programu su nazočili i svoj doprinos dali penzionisani vojni muftija Hadis-ef. Pašalić, glavni imam Salih-ef. Grabus i bojni imam Mehmed-ef. Đidić.

Za muslimane koji učestvuju u međunarodnoj vojnoj vježbi "Immediate Response 25" u Kninu, organizirano je zajedničko obavljanje bajrama i džuma-namaza. Brigadni imam Elvedin-ef. Hokulić i bojni imam Ahmed-ef. Mrahorović za brojne muslimane izveli su prigodan bajramski program i učestvovali u zajedničkom bajramskom druženju.

Međunarodno takmičenje u učenju Kur'ana

Delegacija Vojnog muftijstva Ministarstva odbrane Bosne i Hercegovine, predvođena vojnim muftijom Nesibom Hadžićem, učestvovala je na 10. međunarodnom takmičenju u učenju Časnog Kur'ana za vojno osoblje, koje je održano od 30. januara do 11.02. ove godine u Kraljevini Saudijskoj Arabiji, a u organizaciji ministarstva odbrane zemlje domaćina.

Takmičenje je obuhvatalo više kategorija: hifz tri, pet, deset i dvadeset džuzeva, hifz cijelog Kur'ana, kao i tilavet – lijepo učenje Kur'ana uz primjenu teđžvida.

U komisiji za ocjenjivanje ispravnosti učenja Kur'ana su bili: Dr. Abdullah bin Muhammed el Džarullah, dr. Jasir ibn Rašid ed Duseri - imam u haremu Kabe, dr.

Muhammed ibn Ahmed Berhedži imam u Poslanikovo, a.s., džamiji i dva vojna lica vojske Kraljevine Saudijske Arabije.

Na ovom prestižnom takmičenju, koje je okupilo učesnike iz četrdeset i šest zemalja, predstavnici Ministarstva odbrane BiH ostvarili su zapažene rezultate, dostojno predstavljajući našu zemlju i njene Oružane snage. Delegaciju su, uz vojnog muftiju Hadžića, činili brigadni imami Nedžad Ljevaković, Mustafa Čolakhodžić, Adnan Kovačević te bataljonski imam Enver Merdić.

Pored takmičenja, predstavnici naše zemlje su prisustvovali i konferenciji posvećenoj Kur'anu, na kojoj su govorili istaknuti alimi.



„Dubrave“ pred Ramazan

Predstavnici Vojnog muftijstva na čelu sa Vojnim muftijom Nesib ef. Hadžićem uz mjesec Ramazana te predramazanskih aktivnosti, 25. februara boravili su na lokaciji kasarne i aerodroma „Dubrave“

Tom prilikom Vojni muftija održao je predavanje vjernicima muslimanima istakavši značaj mjeseca Ramazana i naglasivši da mubarek mjesec muslimani dočekuju sa posebnim emocijama, te da miris Ramazana ulazi u domove i srca vjernika sa porukom da budemo bolji prema sebi i prema drugima, te da Ramazan prođe u Božijem zadovoljstvu.

Zahvalnost na iscrpnom predavanju te boravku na

lokaciji kasarne i aerodroma „Dubrave“ Živinice u ime svih pripadnika sa ove lokacije uputili su komandant 5. pješadijske brigade OS BiH brigadni general Fahir Žilić i brigadni imam Elvedin ef. Hokulić.



Tradicionalni iftar vojnog muftije

U Domu Oružanih snaga Bosne i Hercegovine u Sarajevu održan je tradicionalni iftar vojnog muftije, kojem su prisustvovali gosti iz međunarodne zajednice te predstavnici vojnog, diplomatskog, političkog i vjerskog života naše države.

Među gostima su bili prisutni: muftije sarajevski i banjalučki Nedžad-ef. Grabus i Ismail-ef. Smajlović, bivši vojni muftija Hadis-ef. Pašalić, direktor Uprave za vjerske poslove hafiz Mensur-ef. Malkić i predsjednik Sabora Islamske zajednice Edhem Bičakčić.

U svojstvu izaslanika reisul-uleme, iftaru je prisustvovao njegov zamjenik prof. dr. Enes Ljevaković, koji je ovom prilikom naglasio posebnost Bosne i Hercegovine u kontekstu njene širine i multietničnosti.

– Iskoristit ću prilikom da zahvalim za doprinos međunarodne zajednice na uspostavi i očuvanju mira u Bosni i Hercegovini. Ovo je naša zajednička domovina, multietnična i multikonfesionalna, i to uvijek s ponosom ističemo – rekao je dr Ljevaković.

Uputivši prigodnu iftarsku poruku, dr. Ljevaković se osvrnuo na kur'ansku metaforu kojom se lijepa riječ poredi s drvetom, čiji su korijeni duboko u zemlji, a grane prema nebu.

Vojni muftija Nesib-ef. Hadžić je tokom svog obraćanja prisutnima poručio da je ramazan posebno i blagoslovljeno vrijeme koje podsjeća na istinske vrijednosti i plemenite ciljeve.

„Večeras smo ovdje zajedno. Poste i muslimani i pravoslavci i rimokatolici. Svi postimo da bismo bili bliži Bogu u kojeg se uzdamo i molimo Ga za bolje i sigurnije sutra u Bosni i Hercegovini i svijetu,“ rekao je muftija Hadžić. Podsjetio je na važnu dimenziju ramazana koja je u vezi s osjećajem zadovoljstva i zahvalnosti na prepoznatim blagodatima.

„Mi u Bosni konačno trebamo naučiti da volimo ono što imamo, da smo zbog toga zahvalni i da u tome uživamo, a ne da to zanemarimo u borbi za ono što nemamo i što nam niko ne može garantovati da ćemo imati,“ poručio je muftija Hadžić.

Iftaru su prisustvovali i komandant EUFOR-a general Florin Marian Barbu, komandant NATO štaba u Sarajevu Matthew Wallas i glavni kapetan EUCOM-a pukovnik Christopher LaPack.



Centralni bajramski program u Vojnom muftijstvu

Prema planu Ureda Vojnog muftije, Centralni bajramski program u Vojnom muftijstvu realizovan je u mesdžidu kasarne "Rajlovac" u Sarajevu.

Bajram-namaz predvodio je vojni muftija Nesib-ef. Hadžić, koji je u svojoj bajramskoj hutbi uputio poruke o istrajnosti na putu pokornosti Allahu, dž. š. i čuvanju velikog duhovnog zaloga koji su vjernici predano sticali u mjesecu ramazanu.

Prigodan program, učenjem Kur'ana i ilahija, upotunili su glavni imam OS BiH Haris-ef. Hadžić i brigadni imam Nihad-ef. Zukorlić. Nakon bajram-namaza, veliki broj prisutnih vjernika nastavio je ugodno bajramsko druženje uz kahvu i baklavu.

Bajram-namaz u Vojnom muftijstvu klanjan je i u kasarni "Sedme muslimanske brigade" u Zenici i Kampu "Butmir" u Sarajevu.

Dan džamija u Bihaću

Redovna ramazanska analiza rada za Ramazan 2025/1446.godine, na kojoj su razmatrani rezultati ramazanskih aktivnosti te stanje vjerskog života u OS BiH, održana je u kasarni OS BiH „Adil Bešić“.

Nakon izvršene analize, vojni imami su u mesdžidu kasarne „Adil Bešić“ Bihać realizovali prigodan program povodom 7. maja – Dana džamija, nakon čega su se prisutnima obratili glavni imam Haris ef. Hadžić, savjetnik vojnog muftije Muhamed ef. Okić i vojni muftija Nesib ef. Hadžić. U svom obraćanju su naglasili

značaj džamije u životu svakog muslimana kako u prošlosti tako i danas, istakavši posebno ulogu mesdžida na vojnim lokacijama za svakodnevni život i rad pripadnika OS BiH. Na kraju obraćanja vojni muftija se posebno zahvalio dugogodišnjem bataljonskom imamu Enver ef. Merdiću na njegovom radu, posvećenosti i doprinosu vjerskom životu u 2.pb/6.pbr, te je uz prigodan poklon imenovanom poželio da zasluženu penziju provede u zdravlju i blagostanju.

Nakon realizovanih aktivnosti, Nesib ef. Hadžić i vojni imami su izrazili iskrenu zahvalnost komandantu 2. pješadijskog bataljona pukovniku Saidu Veliću na srdačnom prijemu, otvorenom razgovoru i podršci koju pruža njihovom radu.



Posjeta Srebrenici

Muftija tuzlanski Vahid-ef. Fazlović i muftija vojni Nesib-ef. Hadžić boravili su u Srebrenici. Zajedno s gostima iz Vojnog muftijstva, Srebrenicu je posjetio i pomoćnik sekretara ministra odbrane Ujedinjenog Kraljevstva imam Hafiz Asim.

Nakon obilaska šehitluka u Potočarima, upriličena je posjeta Memorijalnom



centru Srebrenica i razgovor s direktorom ove institucije Emirom Suljagićem.

U sjedištu Udruženja Pokret "Majke enklava Srebrenica i Žepa" u Potočarima, muftije Hadžića i Fazlovića dočekale su majke Munira Subašić, Nura Begović, Šuhra Sinanović i Šahida Abdurahmanović.

Razgovarano je o aktivnostima koje majke trenutno realizuju u našoj zemlji i svijetu te predstojećim programima i sadržajima kojima će obilježiti tridesetu godišnjicu od počinjenog genocida u Srebrenici.

Muftiju Hadžića i njegove saradnike u Medžlisu IZ Srebrenica primili su muftija Fazlović i glavni imam Damir-ef. Peštalić. Domaćini su zahvalili gostima na cjelodnevnom boravku u Srebrenici i spremnosti da, kao i ranije, učestvuju u okviru obilježavanja godišnjice genocida nad Bošnjacima.

U razgovorima u MIZ Srebrenica, pored muftija te glavnog imama Vojnog muftijstva Haris-ef. Hadžića i rukovodioca Službe za pravne i administrativne poslove Muftijstva tuzlanskog Dženana Rahmanovića, učestvovali su glavni imami i predsjednici medžlisa Bratunac, Zvornik i Vlasenica. Posjeta je završena obilaskom Doma za starija lica „Hatidža Mehmedović“ i Internatskog smještaja za djecu u Potočarima, o kojima brine MFS-Emmaus.

Posjete zeničkog, tuzlanskog i bihaćkog Muftijstva

Delegacija Muftijstva zeničkog posjetila vojnog muftiju Nesib-ef. Hadžića. S obzirom na to da se radilo o prvoj posjeti Vojnom muftijstvu od inauguracije muftije Hadžića, muftija Dizdarević mu je poželio mnogo uspjeha, uz izraz očekivanja za nastavak plodne i korisne saradnje ova dva muftijstva.



Muftija Hadžić je zahvalio muftiji Dizdareviću, kao i njegovim saradnicima Edin-ef. Kavazoviću i Sumedin-ef. Kobilici, te podsjetio da se na području Muftijstva zeničkog nalazi nekoliko kasarni Oružanih snaga Bosne i Hercegovine u kojima djeluju i vojni imami.

U vezi s tim, vojni muftija iskazao je zahvalnost zeničkom muftiji za podršku u radu ovih imama i naglasio koliko je važno da se ta saradnja nastavi i stalno unapređuje. Sastanku su još prisustvovali glavni imam Oružanih snaga Bosne i Hercegovine Haris-ef. Hadžić i stručni savjetnik vojnog muftije Muhamed-ef. Okić.

Vojni muftija Nesib-ef. Hadžić u Ministarstvu odbrane BiH primio je i delegaciju Muftijstva tuzlanskog, koju je predvodio dr Vahid-ef. Fazlović, muftija tuzlanski.

Ova posjeta, kako je istako muftija Fazlović, čin je međusobnog uvažavanja i jedna je od brojnih aktivnosti kvalitetne saradnje ova dva muftijstva. Muftija Fazlović naglasio je da je rad Vojnog muftijstva i Oružanih snaga Bosne i Hercegovine kod našeg naroda sve vidljiviji i cjenjeniji, te je s tim u vezi još jednom muftiji Hadžiću poželio mnogo uspjeha u poslovima koji ga očekuju.

Muftija bihaćki hafiz Mehmed-ef. Kudić, posjetio je muftiju vojnog Nesib-ef. Hadžića u njegovom uredu u Sarajevu. Tokom susreta razgovarali su o brojnim pitanjima koja se tiču Islamske zajednice, s posebnim fokusom na unapređenje vjerskog života u institucijama države Bosne i Hercegovine. Ovo je prva posjeta muftije Kudića muftiji Hadžiću otkako je imenovan za muftiju vojnog.



BiH obilježila snažnu prisutnost i poruke mira

Visoka delegacija Bosne i Hercegovine uspješno je okončala Međunarodno vojno-policijsko hodočašće koje se od 12. do 20. maja po 65. put održava u Marijanskom svetištu Lourdes u Republici Francuskoj. Među delegacijama više od 40 zemalja svijeta, BiH je imala snažnu prisutnost brojnih i visokih hodočasnika, obilježavajući svoje 24. učestvovanje na ovom značajnom duhovnom događaju.



Delegaciju Bosne i Hercegovine predvodili su zamjenik predsjedavajućeg Doma naroda Parlamentarne skupštine BiH Dragan Čović i zamjenik ministra odbrane BiH Slaven Galić. U delegaciji su bili i zamjenik načelnika Zajedničkog štaba OS BiH za operacije generalmajor Tomo Kolenda, pomoćnik ministra odbrane



BiH za međunarodnu saradnju Zoran Šajinović, zastupnica u Predstavničkom domu PS BiH Darijana Filipović, ministrica prometa i komunikacija Federacije BiH Andrijana Katić, šefica Ureda zamjenika ministra odbrane BiH za politiku i planove Danijela Bilić te ostali pripadnici OS BiH i uposlenici MO BiH katoličke vjeroispovjesti.

Katolički pripadnici Ministarstva odbrane i Oružanih snaga BiH, predvođeni vrhbosanskim nadbiskupom i apostolskim upraviteljem Vojnog ordinarijata u BiH mons. Tomom Vukšićem, započeli su hodočašće misnim slavljem u župi Sv. Ante Padovanskog u Gornjoj Močili – Sijekovac. Već idućeg dana susreli su se s hodočascima iz Oružanih snaga i Ministarstva odbrane Republike Hrvatske u Avignonu, gdje je mons. Vukšić predvodio misu uz koncelebraciju 24 svećenika – većinom vojnih kapelana iz BiH i Hrvatske.

Tokom hodočašća u Lourdesu, euharistijska slavlja, procesije i Križni put održavali su se i na hrvatskom jeziku. Vrhunac programa bilo je svečano otvorenje hodočašća, kojem je prisustvovala visoka delegacija BiH, te misa u bazilici Kraljice Svete Krunice. U subotu, dan nakon svečanog otvaranja, u večernjim satima upriličena je procesija sa svijećama na kojoj su učestvovali svi hodočasnici iz BiH i RH. Brigadir Hrvoje Turudić komandovao je strojem OS BiH tokom svečanosti.

Hodočašće u Lourdesu simbolizira zajedništvo, molitvu i pomirenje, a ove godine ponovno je poslalo snažnu poruku: mir je moguć i potreban – i za narod i za one koji mu služe. Bosna i Hercegovina i njezini predstavnici dostojanstveno su predstavili zemlju na ovom jedinstvenom međunarodnom susretu vojski i policija iz cijelog svijeta.

Pepelnica za pripadnike MO i OS BiH u Sarajevu

Na Čistu srijedu – Pepelnicu, 5. marta, u sjemenišnoj crkvi Sv. Ćirila i Metoda u Sarajevu, za katolike pripadnike Ministarstva odbrane i Oružanih snaga Bosne i Hercegovine svetu misu slavio je generalni vikar Vojnog ordinarijata u BiH mons. Željko Čuturić, uz koncelebraciju vojnog kapelana vlč. Fabijan Stanušić.



Tom prilikom, mons. Čuturić je napomenuo kako u korizmi, više no inače, „Isus poučava kako treba činiti djela pravednosti:

milostinju, molitvu i post“. Posvijestio je kako milostinju treba dijeliti u skromnosti i neupadno u ljubavi prema Bogu i čovjeku kome je to potrebno. Mons. Čuturić je istakao da u molitvi čovjek ne smije biti licemjer da moli tako da bi ga drugi hvalili.

„Molitva bez poniznosti nije molitva i mora biti čin naše skrušenosti“, dodao je i pred kraj promišljanja napomenuo kako post treba pripomoći u kročenju svoga tijela kako bismo ga navikli na poslušnost protiv zlih sklonosti, ali i prigoda za uštedu kako bi se pomoglo ugroženima.

„Okoristimo se ovim vremenom korizme kao periodom ozbiljnosti i skrušenosti za spas svoje duše, ali i dobro svoga bližnjega“, rekao je mons. Čuturić na kraju.

Nakon svetopisamskih čitanja i naviještenoga evanđelja uslijedio je sam obred pepeljanja pepelom, koji je dobiven od prošlogodišnjih blagoslovljenih grančica pripremljenih za Cvjetnicu. Ovom misnom slavlju prisustvovali su pomoćnik ministra odbrane BiH za međunarodnu saradnju Zoran Šajinović i pročelnica Kabineta zamjenika ministra odbrane BiH za politiku i planove Danijela Bilić.

Istoga dana, za pripadnike OS BiH u Rajlovcu, vojni kapelan Stanušić slavio je svetu misu u vojnoj kapeli posvećenoj Bl. Ivanu Merzu u Rajlovcu. Dan prije, na pokladni utorak, generalni vikar Čuturić predvodio je misno slavlje u župi Sv. Ivana Krstitelja u Tarčinu, za aktivne vojne i civilne osobe Zajedničkog štaba OS BiH, Ministarstva odbrane BiH te Vojnog ordinarijata MO BiH. Nakon mise, kojoj je prisustvovao i zamjenik načelnika Zajedničkog štaba OS BiH za operacije generalmajor Tomo Kolenda, uslijedilo je i tradiconano druženje vjernika.

Hodočašće pripadnika OS i MO BiH Gospi Olovskoj

Pripadnici Oružanih snaga i Ministarstva obrane BiH, predvođeni apostolskim upraviteljem Vojnog ordinarijata u BiH mons. Tomom Vukšićem, u srijedu 28. maja, povodom Jubilarne godine, hodočastili su Gospi Olovskoj.

Svoje hodočašće započeli su pokorničkim bogoslužjem, koje je predvodio vojni kapelan iz Orašja fra Marinko Živković. Prisutni su imali priliku za svetu ispovijed, a na raspolaganju su bili svećenici iz Sutješkog dekanata te vojni kapelani.

Nakon ispovijedi, misu je predslavio vrhbosanski nadbiskup i apostolski upravitelj Vojnog ordinarijata u BiH mons. Tomo Vukšić uz koncelebraciju deset svećenika među kojima su bili: provincijal Bosne Srebrene fra Zdravko Dadić, čuvar svetišta fra Ilija Božić, generalni vikar Vojnog ordinarijata u BiH mons. Željko Čuturić, kancelar Vojnog ordinarijata u BiH preč. Josip Tadić. Na euharistiji je bilo nazočno i 12 đakona polaznika Đakonske pastoralne godine.



Na početku misnog slavlja fra Ilija pozdravio je prisutne pripadnika OS BiH, predvođene zamjenikom načelnika Zajedničkog štaba OS BiH za operacije generalmajorom Tomom Kolendom, kao i prisutne zaposlenike MO BiH.

U svojoj homiliji, nadbiskup Vukšić je poručio da misna čitanja u 21. vijeku upozoravaju kako ljudi u svome životu i danas mogu izabrati da im ovosvjetovne stvari budu važnije od onostranih. Progovorio je o riječi „obožavanju“ koje se koriste u kontekstu vrednota ovoga svijeta, što ne bi trebalo imati središte u vjerničkom životu. Propovijed je zaključio poticajem da ljudi prestanu biti sluge svojim slabostima.

Nakon mise uslijedila je podjela diploma polaznicima Đakonske pastoralne godine.

Centralni Božićni prijem u kasarni OS BiH „Kozara“ u Banjaluci

Tradicionalni prijem povodom obilježavanja praznika Rođenja Gospoda Isusa Hrista - Božića, organizovan je 13. januara 2025. godine u Kasarni „Kozara“ u Banjaluci.



Domaćin Božićnog prijema u Klubu Vojske Republike Srpske, u kasarni „Kozara“, bio je zamjenik ministra odbrane BiH



za upravljanje resursima Aleksandar Goganović, u saradnji sa Kancelarijom pravoslavnog dušebrižništva MO BiH te Trećim pješadijskim (Republika Srpska) pukom OS BiH.

Obilježavanje Božića započelo je Svetom arhijerejskom liturgijom koju je, u hramu Svetog velikomučenika kneza Lazara u Lazarevu, u Banjaluci, služio Njegovo Preosveštenstvo Episkop bihačko-petrovački G. Sergije, uz sasluženje vojnih sveštenika MO i OS BiH.

Svečanosti su prisustvovali srpski član Predsjedništva BiH Željka Cvijanović, načelnik Zajedničkog štaba OS BiH general-pukovnik Gojko Knežević, sa generalskim korom OS BiH, brojni uvaženi gosti iz političkog, javnog i privrednog života, kao i predstavnici vojno-diplomatskog kora u BiH, predstavnici institucija sa nivoa BiH i Republike Srpske, predstavnici Vlade RS, te predstavnici boračkih organizacija iz Republike Srpske.



Krsna slava paraklisa Svetog Teodora Stratilata u Derventi

Dana 21. februara 2025. godine, kada Srpska pravoslavna crkva slavi uspomenu na Svetog velikomučenika Teodora Stratilata, pravoslavni pripadnici OS BiH, Inženjerskog bataljona u Derventi, proslavili su Krsnu slavu paraklisa koji je posvećen ovom Svetom ugodniku Božijem.

Svetu Liturgiju su služili: protojerej Siniša Maksimović iz Dervente, protojerej Milorad Milinković, nastojatelj Kancelarije pravoslavnog dušebrižništva u MO BiH, jerej Nemanja Lakić Lakić, Glavni sveštenik u OS BiH, protonamjesnik Miroslav Todorović, bataljonski sveštenik 3pb/5pbr i jerej Davor Arnaut, brigadni sveštenik u 5.pbr, uz molitveno prisustvo uvaženih gostiju iz grada, te gostiju iz struktura odbrane.

Parastos za stradale od NATO bombardovanja

U Sabornoj crkvi u Sarajevu, 24.03.2025. godine, služen je parastos za stradale od NATO bombardovanja.

Parastos su služili protojerej Milorad Milinković, nastojatelj Kancelarije pravoslavnog dušebrižništva, protojerej Nemanja Đureinović, starješina Saborne crkve, jerej Nemanja Lakić, glavni sveštenik u OS BiH i jerej Tomislav Pajević, stručni savjetnik nastojatelja.

Parastosu su prisustvovali pravoslavni pripadnici Ministarstva odbrane i Zajedničkog štaba OS BiH.



U Trebinju obilježen Vidovdan – krsna slava Trećeg pješadijskog (Republika Srpska) puka OS BiH i Vojske Republike Srpske

U Trebinju je 28. juna svečano obilježen Vidovdan, krsna slava Vojske Republike Srpske i Trećeg pješadijskog (Republika Srpska) puka Oružanih snaga BiH, jedinice koja baštini i njeguje slavne vojničke tradicije srpskog naroda.

Obilježavanje je počelo u ranim jutarnjim časovima svetom arhijerejskom liturgijom u Sabornom hramu "Preobraženja Gospodnjeg" u Trebinju, nakon čega je služen pomen i parastos svim poginulim borcima srpskog naroda – od Kosovskog boja do savremenih vremena. Nakon bogoslužjenja, u krugu hrama obavljen je slavski obred i tradicionalno lomljenje slavskog kolača, kojim je na simboličan način potvrđen zavjet očuvanja vjere, slobode i časti srpskog naroda.

Svečanosti su prisustvovali zamjenik ministra odbrane BiH za resurse Aleksandar Goganović, generalski kor, predstavnici Trećeg pješadijskog (Republika Srpska) puka OS BiH, boračkih organizacija, Srpske pravoslavne crkve, institucija Republike Srpske, porodice poginulih boraca, kao i brojni građani Trebinja i Istočne Hercegovine.



U duhu sabornosti i zajedništva, upućene su poruke mira, dostojanstva i sjećanja na sve srpske junake koji su kroz istoriju svoje živote utkali u temelje slobode. Vidovdan, kao jedan od najvažnijih datuma u srpskoj istoriji i duhovnosti, i ove godine je u Trebinju obilježen dostojanstveno, uz prisjećanje na vjekovnu borbu srpskog naroda za opstanak i slobodu.

Predstavnici vjerskih službi MO i OS BiH na Međunarodnoj konferenciji u Briselu

Predstavnici vjerskih službi MO i OS BiH, učestvovali su na 36. Međunarodnoj konferenciji rukovodilaca vojnih vjerskih službi, koja je održana od 27. do 31. januara u Briselu u Belgiji.

Na Konferenciji su učestvovali nastojatelj Kancelarije pravoslavnog dušebrižništva, protojerej Milorad Milinković, jerej Tomislav Pajević, stručni savjetnik don Josip Tadić, stručni savjetnik, referent Antonio Šutalo, vojni muftija Nesib Hadžić i stručni savjetnik Muhamed Okić.

Na Konferenciji je učestvovalo 165 predstavnika, iz 42 nacije i više od 30 različitih vjerskih/duhovnih denominacija.

Tokom boravka u Briselu, vjerski službenici su posjetili Vojnu misiju BiH pri NATO-u, gdje ih je srdačno dočekaio brigadir Boris Kozlić, šef Vojnog dijela misije BiH pri NATO-u, sa svojim saradnicima, koji su tom prilikom gostima približili ulogu i značaj misije koja je uspostavljena 2009. godine.



NAŠA VOJSKA НАША ВОЈСКА

Bilten Ministarstva obrane - odbrane i Oružanih snaga Bosne i Hercegovine
Билтен Министарства одране - одбране и Оружаних снага Босне и Херцеговине

Pratite nas i na društvenim mrežama:



<http://www.mod.gov.ba/>



<http://os.mod.gov.ba/>



<https://www.facebook.com/modbih>



Kanal Ministarstva odbrane BiH:
<https://www.youtube.com/channel>

www.mod.gov.ba

www.os.mod.gov.ba



[oruzanesnage_bih](https://www.instagram.com/oruzanesnage_bih)